



2
ISAGOGE
ADLECTIONEM
Epistolarum Dini Pauli Apostoli, qua compositionis œconomia, & germana dispositio indicatur.

A

Ben. Aretio Theologo
Bernensi.

LAVSANNÆ.

Exudebat Frāciscus le Preux,
Illust. D. Bernensi Typog.

1579.



Olc. C. II 3780

TYTOMPHVS
LECTORI S.



*V*anti momenti apud omnes pios esse debeat Pauli doctrina (Christianae lettor) vel hoc unū fatis indicat, quod omnibus seculis quotquot extiterunt lucis & veritatis hostes, eō maximè omnes ingenij neruos intenderunt, ut eā vel euerterent aperte, vel astutè deprauaret. Digni profectò homines quos Deus cæcitat̄ & amentia tenebris inuoluat, quādo ita accedūt ad Scripturas, ut eas vel conētur torque re violēter, vel furiose oderint, nisi ad arbitriū sequantur. Sed vicissim agno scenda singularis Dei prouidentia, qui semper excitauit pios Doctores, presertim nostra hac etate, à quibus sacra hæc mysteria ita perspicuè illustrata sunt, ut iā nō sit obscuritati locus. Ne-

A.ij.

que vero etiam mediocris debetur iis
gratia, qui tametsi integrōs commenta-
rios non texūt, Theologiae tamen candi-
datos plurimū iuuant, dum totius o-
rationis œconomiam, argumentorum se-
riem, & locorum fontes indicāt: ne-
sicuti antea factum est, in scriptis Apo-
stoli temere vagentur, tanquā in re-
gione incognita hospites & peregri-
ni. Ex eo genere libellum hunc D. Be-
ned. Aretij doctissimi Theologi in ipso
rum gratiam libēter vulgamus: quem
quidem ita speramus pijs & studiosis
profuturum, ut simul agnoscāt ij qui
bus sacra sordet, & qui tantū miratur
profana, ne ipsi quide Spiritui sancto sua
Dialecticen, suam methodū,
Innam elocutionem deesse.

Vale. Lausanne, 7.

Calend. Feb.



DISPOSITIO IN EPISTOLAM AD ROMANOS.

QVIS FVERIT AVTOR
Epiſtola ad Romanos.

DE Paulo Apostolo primo loco dicendum est, quia communis consensu, non solum huius, sed sequentiū etiam Epistolarū est autor, eoque liberiū, ne deinceps in hunc locum nobis sit digrediūdum. Duo extant illius nomina: nam Act. 7.9. 13. Saul dicitur, & eodē 13. mox Paulus appellatur, quo nomine deinceps historia semper utitur, adeoque constanter, ut D. Petrus in 2. A. iij.

Saul. Epistola capite 3. Paulum maluerit dicere, quām Saulē. Saul indubitanter Hebræum est, ac sonat postulatū, quod nomen à parentibus Hebræis in Circuncisione, sine dubio accepit, quemadmodum nos hodie in Baptismo nostra accipimus nomina: & videntur eius parentes illustri nomine, illū voluisse ornare, quale in tribu Beniamin magnificū erat,

Paulus. eiusdem nominis fuit. Pauli autem nomen variè interpretatur, alij Hebræum, alij Græcum, alij Latinum faciunt. In primis autē mihi placet

August. Augustini sententia, qui contendit *Psal. 72* Latinū esse, & recte à paruo, id est *& homi* modico, deriuat, nā antiquitus Pauli dicebantur parui. Qui à Græcisderiuant, quietum interpretatur, hoc enim *παυλα* sonat. Verū apud Græ-

IN EPIST. PAVLI. 7

cos historicos nullibi reperies hoc nomen proprium esse , neque apud Thucydidem, Herodotum, aliōsq;, imò ne apud Poētas, Hesiodū & Homerū: itaque nō est propriū nomē vetustū. Apud recētores quidē historicos reperitur , sed qui historias Latinas in Græcam linguam trāstulerunt , qualis est Appianus , Dion , Plutarchus , & similes: ex quo euidēter constat , nulla probabili ratione Pauli nomē Græcum posse dici , sed planè Latini sermonis esse propriā vocem . Minùs probabilia dicunt , qui originem ab Hebræis repetunt , cùm ex propriis linguis nominū sit deriuatio petenda , necdum probatum sit vocē esse Hebræam , quod quidem vtiliter admonet D. Hieronimus , quanuis id non seruet vbi-
Hieronimus.

que. Nam in commentariis in epi-

A.iiiij.

stolam ad Philemonem, initio & fine, admirabilem interpretatur, quia Pelē talē significat apud Hebræos, quasi Paulus à Pelē deriuetur. His vicini sunt, qui cū non ausint fate ri Hebræam esse dictionem, tamen asserunt à Saule defluere: sed his obstat, quod Latini Paulos habuerunt, priusquam vlla communione innotescerent ipsis Iudæi. Itaque non est probabile Latinos Paulū à Saule suffisse. Hæc de Pauli nomine dicta sufficient.

Quan-
do cœpe
rit dici
Paulus. Quæritur iā de tempore, quando scilicet cœperit dici Paulus, quod quidem magis curiosè fit quam uti. liter, nam scriptura nihil certi habet hac de re. Ac quanquam de Saule quoque nihil expressum sit, extat tamen lex & consuetudo Circuncisiōnis, in qua simul octauo die nomi-

na imponebatur: itaque hoc ex consequenti demonstrari potest.

Quod de Pauli nomine dici non potest, cum non gemina nomina simul imponerent suis infantibus: quare hic coniecturis & probabili sententia agendum est. Hieronimus indicat ex re gesta illi hoc non men contigisse. Nam cum Sergium Paulum Cypri Proconsulem, ut est in Eccl. scriptis scripsit p:ori-
Act. 13. conuertisset, ex eo facto, & bus. deinceps semper dictum esse Paulum. Nec obstat huic sententiæ quod idem eodem capite dicatur Paulus, priusquam conuertisset Proconsulem: nam historiam postea conscripsit Lucas, nec erat cogendus, contra leges narrationis, quibus liberum illi erat boni ominis causa Paulum nunc dicere, cuius historiam mox narratus erat, ut constaret lectori quid de succes-

su in hac narratione illi sperandū es-
 set. Augustini verò est sentētia , hoē
 Augu- flus. nomē illi accessisse ob mutatam re-
 ligionem , quam habet ab Ambro-
 Ambro- sio: Probabile & hoc est, quādoqui-
 jas. dem & hodie Iudæi cum religione
 mutant nomina . Sed in Apostolo
 nostro illud obiicitur , quod post
 mutatam religionem bis adhuc no-
 minatur Saul, verū id ratione non
 caret. Nam Spiritus S. Iudæum inter
 Iudæos Saulem nominat, & iam se-
 gregandum ad ministerium Eccle-
 siæ Gétium vltimò: inde Lucas com-
 modè ad nomen Pauli transit: Sau-
 lus, inquit, qui & Paulus , ita transit
 à veteri nomine ad nouum, nec de-
 inceps priori nomine amplius vti-
 tur. Chrysostomi & Theophylacti
 Chryso- flomus. est, diuinitus illi mutatum nomen,
 quemadmodū Petro , qui dictus est
 Cephas

Cephas à Domino Christo, & filii
Zebedei vocati sunt Boanerges, qui
bus ne esset inferior, vt ait Theophaetus, mutatum est illi nomen.
Sed tamē in eo inferior est, quod de
illis extat scriptura, mutati scilicet
nominis diuinitus: de Pauli verò no
mine sic mutato nihil extat. Aliis pla
cet, ob ius Romanæ ciuitatis sponte
Aliorū sententia
ab ipso mutatū. Nā Tarsus illius pa
tria, iure Romanæ ciuitatis fuerat
donata à M. Antonio. Itaque vt He
bræ o nomine se fatebatur Iudæum
simpliciter, sic Latino ciuem Roma
num se profiteri voluit. Hi verè con
sentiunt cum Origene, qui illum fa
cit binominem, quam sententiam *Origo.*
nes.
etiam libenter amplector. Non solùm
quia affinitas est inter ipsa vocabula
aut quod reges in veteri Testamen
to, aliique multi binomines fuerunt

sed quòd videam hoc in primis Iudeis fuisse familiare, ut scilicet Gentium quoque nomina apud quas exularent, interdum assumerent. Nam Ioseph certe apud Ægyptios Saphnat dicitur. Sic Daniel in Babylone Belsazar, Ananias Sedrac, Azarias Abdeneago, Misael Mesac appellantur, ut constet priora nomina esse Hebreæ, Ioseph, Daniel, &c. reliqua verò assumpta certa ratione ex lingua Gentium, cum quibus versabantur. Sic omnino probabile est, Paulū Iudeis fuisse Saulem, sed quia idem in Romano imperio peregrinabatur, Romanum quoque assumpsisse nomen, quamcunque tandem ob causam, siue ad declarandum ius Romanæ ciuitatis, siue ob mutatam simul religionem, quam cupiebat Romanis etiā inferre populis, siue ob conuersum

uersum Sergium Paulum, siue diuinatus, siue humanitus, siue ob ista omnia, dici facilè non potest: hoc tamen certum est, Deo sic ordinante factum esse, quod declarauit euētus, cùm magna dignitas, & gratia ministerio suo inde accesserit, adeò ut tāquam hominis Romani vbiique videamus, non solum nomē, sed & doctrinam fieri plausibilem, & hoc cōfilio indubie in omnibus Epistolis suis, potius voluit doctrinam ornare Pauli nomine, quam Saulis.

Patria illi splendida fuit: Tarsus
 scilicet ciuitas Ciliciæ, quod ipse Apostolus indicat Acto. 22. Tarsi, inquit, natus, nutritus in hac vrbe. Ceterum ad Philipp. 3. capite, & in 2. Epistola ad Cor. ii. 22. etiam exprimit genus ex Israele, tribū Beniamin, & similia. D. Hieronymus aliam indi- *Patria
Pauli.
In eccl
siaſtis.*

ISAGOGÉ

14

*scripto-
ribus.*

cat patriā, quod scilicet oriundus fuerit ex Giscalis oppido; de tribu Beniamin, unde cum parentibus, capto nisi mirū Giscali à Romanis, in Tarsum Cilici, cōmigrarit. Verum non congruunt hæc cum Pauli narratione, Act. 22. ubi fatetur se natum Tarso, neque est credibile; eum quicquam ibi tergiuersatum esse, præsertim inter Iudæos & hostes, qui hoc tanquam mendacium arripuit: tamen fieri potuit, ut parēt illius, inde in Tarsum profugerint.

*Præce-
ptoros.*

Præceptorem habuit in lege Moses insignem illum Gamalielum Pharisæum, ad cuius pedes enutritus est, Act. 22. Quanta autem fuerit Gamalielis authoritas, constat ex 5.³⁴ cap. Actor. Hieronymus addit studiorum gratia Hierosolymam missum à parentibus, & hunc electum sibi præcepto

ceptorē. In Christianismo præceptō rem habuit ipsum Dei filium Act. 9.^{5,6}. Hinc ad Gal. i.¹. cap. audacter profite-
tur se neque ab homine , neque per
hominē doctū esse: itaque verè fuit
Θεος οὐδακτος, vnde etiam est factum,
ut non diu manserit cum Apostolis
Hierosolymis, ne quid videretur ab
homine didicisse, ad Gal. ^{i, 2}¹². Quæ o-
mnia faciunt ad maiestatem scripto-
rum eius.

Vitæ genus per omnia castum & *Vitæ gen-*
sanctissimum fuit, que in admodum ¹¹¹
ipse fatetur , secundū exquisitissimā
legis sectam, Act. 22⁷. Porrò ad Philip.
3.⁸ & ad Galat. i.⁹ magnas sibi usurpat
virtutes, diligentiam scilicet defen-
dendi patrias traditiones , eruditio-
nem in lege, zelum erga Deum, fœ-
licitatē in discendo, qua etiam ante-
uerterit multos coequales, secta ge-

nus præstantissimum. Erant enim Pharisæi reliquis tolerabiliores.

Cum his virtutibus quoque in-
Ante cō hæsit illi, nō animi, sed se & potius
uerſionē morbus & vitium, quod scilicet per-
 secutus est Ecclesiam Dei, Acto. 9.
 & 22. Hanc viam, inquit, persecu-
 tus sum usque ad mortem, vinciens
 & tradens in carceres, tā viros, quām
 mulieres, ad Gal. primo, supra mo-
 dum, inquit, persecutus sum Eccle-
 siam Dei. Sic priori ad Corinthios 15.
 non sum dignus qui vocer Aposto-
 lus, qui persecutus sum Ecclesiam
 Dei, Ad Philippenses. Quod zelū
 attinet, persequens Ecclesiam Dei,
 priori ad Timotheum in cap. primitis
Mores eram blasphemus, persecutor, &
in cōuerſione. injuriosus.

Verum hunc animi morbum, &
 acerbitate mī de posuit mox in con-
 uersio-

fione, in qua præter spē & illius meritum, omnia illi miraculoſo, & ſtupendo modo contingunt fœliciſſima, Act. 9. Ante conuerſionē lupum dixeris & vaſtatorem gregis domini- nici: in cōuerſione verō ouem, quæ ſe Deo libenter ſubmittat, adeò ut quærat, quid viſ me facere Domi- ne? Inde in priori ad Timotheum r. capite excusat, quòd ignorans hæc omnia fecerit, & in priori ad Corin- thios 15. 10. Gratia Dei ſum id quod ſum.

Post conuerſionem autem eſt do- Mores
ctor Gentium & Ecclesiæ propu- post co-
gnator, vt non malè de illo citetur il- uerſionē
lud Gen. 49. Beniamin lupus rapax
manè diripit prædam, vesperī diui-
dit ſpolia: nunc enim nulli cedit, a-
deò ut nullis Apoſtolis velit eſſe in-
terior, 2. ad Cor. II. ad Rom. 15. Nam
præter nouas regenerationis virtu-

B. j.



IN EPIST. PAVLI.

tes, priores quoque auctæ & confirmatae sunt, qualis imprimis fuit eloquentia, & peritia non solū legis Moysæ, sed Gentilium quoque literarum. Ac eloquentem fuisse, arguunt illius conciones, præsertim in Actis, qualis est illa 17.^z capite inter Philosophos habita, & quas Hierosolymis habuit, Actorum 22: & 23: & sequentibus capitibus, in quibus appareat eum valuisse vi quadam persuadendi, quam Græci δεῖπνον vocant: tales etiam sunt eius disputationes, qualis est Actorum 13.^z contra Magum illum, & capite nono contra Iudeos. Huc pertinent etiam epistolæ illius, eloquentiae illius, & eruditio locupletes testes. Ac Gentilium literarum fuisse peritum testimonia sunt ad Titum primo capite, ubi Epimenidis citat versum. Sic Actorum 17.^z Arati hemistichium citat, priori ad Corinthios

Corinthios 5. Menandri Iambum,
quæ omnia arguunt Philosophiæ &
politioris literaturæ fuisse peritum,
imprimis verò Dialectices, quam
non aliunde poterat discere, quam
ex humanioribus literis. De quibus
ne sim prolixior, vide Hieronymū
ad Oratorem magnum Romanum
& aduersus Ruffinum, & quæstio-
ne 10. ad Algasiam, & II. ad Hedibi-
am. Eusebium libro tertio historiæ
Ecclesiasticæ 24. capite, Origenem
in Canticis, & Chrysostomum in
octo Homiliis, quas de laudibus
Pauli reliquit, Augustinum libro
quarto de ciuitate Dei capite nono.
& contra Cresconium Grammati-
cum, capite decimo quarto: Cyril-
lus in caput 16. Ioannis, receptacu-
lum misteriorum Dei vocat illum,
vno fasce omnes illius laudes com-
prehendens.

Dema- Expedienda etiā hic est quæstio de
trimo- Apostoli matrimonio. Negat hoc
nio
Pauli. Augustinus capite quarto de ope-
 riis Monachorum , & γυνὴ illi
 mulier est , & non vxor. In eadem
 sententia est Epiphanius , ratio illius
 est, quòd Apostolus suo exemplo su-
 adeat cælibatum. Idem multis placu-
 is sedoctoribus testatur Nicephorus
 lib.2.cap. 44 , & comparē ait σύζυγον
 posse intelligi viri nomen quem sa-
 lutet. Sed multis contrà placet senté-
 tia Clementis Alexádrini, qui lib.3,
 Stromáton testatur Paulum fuisse v-
 xoratum , & locum ad Philippenses
 4^o rogo te σύζυγε γυνότε compar ger-
 mana , de vxore interpretatur , nec
 me fallit interim σύζυγον etiam signi-
 ficare consiliorum socium , & com-
 militonem & similia, verùm conce-
 dendum tamen est , hac voce etiam
 significari vxorem. In hac sententia

e st

est Eusebius Ecclesiasticæ historiæ lib.3.cap.30, Vbi Petro & Philippo vxoratis etiā connumerat Paulum. Clementis sententiam refert etiam Nicephorus lib.2.cap.44. Cæterūm parūm refert , habuerit nec ne , satis est hoc illi licuisse, siquidē voluisset, aut instituto suo expediuitset: i. ad Corinth.9. 5.

Porrò his tantis virtutibus, & co-
natibus, non defuit successus & do-
cendi felicitas , nam à Hierosolymis
& regionibus circuniacé tibus usque
ad Illiricum omnia cōpleuit Eu an-
gelio Christi. Id quām verè de se di-
cat, testantur peregrinationes , quas
obiit in Pamphylia, Pisidia , Lycao-
nia, Syria, Cilicia, Mysia , Macedo-
nia, Achaia, Galatia, Phrigia, Cypro
& aliis Insulis , sicuti describuntur à
Luca in Actis , à cap.13. usque ad finē:
& Eusebius easdem lib.3.cap.4.copi
B.ij.

osè explicat. Item Nicephorus lib. 2.
bonam partem cōsumit illius labo-
ribus enumerandis à capite. 19. vsque
ad 38. vbi solùm Pauli res gestas per-
sequitur, & Athanasius affirmat ad
Dracontium, illum Hispanias quo-
que adiisse, quod factum est, post il-
lius primā defensionem, cù mā Ne-
rone esset dimissus: & 15. ad Rom.
scribit se cogitare eò proficiisci , &
probabile est, si in Hispaniā, vt spēra-
bat sit profectus, eū simul adiisse ya-
rias & procul dis̄tas prouinciass.

*Opera
illius ge-
nuina.* Sed nos veniamus ad eius opera,
quæ quidem omnia conscripsit epi-
stolari genere, ac sunt bipartita. Aut
enim dedicauit integris ecclesiis, aut
priuatis personis. Illius generis sunt,
Ad Romanos, ad Corinthios, Galas-
tas, Ephesios, Philippenses, Collof-
senses, Thessalonicēses, & ad Hebræ
os: huius vero generis sunt, ad Timo-
theum

theum, ad Titum & Philemonem.
Præter illa scripta olim circūfereban-
tur quædam Apocrypha illius nomi *Apocry-
ne* in Ecclesia, sed falso. Talis erat Epi-*phæ.*
stola ad Laodicenses, cuius meminit
Hieronymus, & August. in 16. caput
Ioānis, citat Pauli Apocalypsin, cuius
meminit etiā Nicephorus lib. 12,
capite 34, quam dicebant repertam
in Pauli domo paterna, Tarsi, in the-
ca quadam marmorea, temporibus
Theodosij imperatoris, quod tamē
falsum esse ostendit, cuiusdam senis
confessione. Idem Nicephorus libro
duodecimo, cap. 46, refert librū quē-
dam Actorum Pauli, & Clemēs A-
lexádrinus citat quædā Paulina alia,
tamen non sunt recepta. Sed reuer-*Ordo*
tamur ad illius scripta germana: in *Pauli
norma*
his duplex ordo considerari debet, *scriptio-*
temporis scilicet & editionis. Tem-*rum.*
poris ordinem intelligo, quo sunt
scriptæ

scriptæ, editionis vero quo extat in
Canone. Scriptæ ergo ut doctis pla-
cet, sunt hoc ordine: omniū primo
scriptæ sūt duæ ad Thessalonicenses
ante reliquas omnes, idque Athenis,
quod testatur etiam subscriptio.
Hos instituerat feliciter in religio-
ne Christi, mox inde digressus in via
ne deficeret à noua religione, gemi-
na epistola eos confirmauit. Tertia
inde videtur scripta, prior ad Timo-
theū, Laodiceæ, Phrygiæ Pacatianæ.
Quarta ordine fuerit prior ad Co-
rinthios ex Epheso scripta, quò facit
historia Actorum 19. Quinta illa ad
Titum ex Nicopoli Macedonię. Sex-
ta posterior ad Corinth. ex Philippis
Septima ad Romanos, quos nō dum
yiderat, sed audierat solum recte
institutos: eos igitur absens confir-
mat ex Corintho in itinere, cum vlti-
mo iam ascenderet Hierosolimam
vnde

vnde mox Romam captiuus per-
tractus est. Postea Rome in vinculis,
& libera custodia, integro illo bien-
nio sequentes scripsit, & hoc, ut ap-
paret, ordine. Primùm illā ad Phi-
lippenſes, quod testatur subscriptio.
Et capite i. meminit suorum vincu-
lorum, tanquam rei nouę, ut vel hoc
nomine haberī possit prima: & cap.
4. familiæ Cæſaris meminit. Dein-
de subsecuta est illa ad Coloffenses.
Tertiò illa ad Philemonem, sunt
enim nomina salutantium hac ea-
dem fermè, duæ in illa ad Coloffen-
ses, ut eodē tempore videantur scrip-
tae. Quarta illa ad Ephesios in qua
est argumenti magna similitudo, cū
illa ad Coloffen. Quinta posterior
ad Timotheū, in qua conqueritur,
se desertū ab omnibus ferē, adeò ut
Demas quoque, qui dum scribere-
tur illa ad Coloffenses, ad huc fuerit
constans

constans, illū quoque deseruerit, vt
appareat hinc illam esse posteriore. Sextò illa ad Galatas, in qua seuerissimè inuehitur in cæremonias, adeò
vt non dubitet dice re: Si vel Ange-
lus aliud Euangeliū anunciauerit
vobis, præter id, quod prædicaui-
mus vobis, anathema sit, & capite 5.
simpliciter pronūciat de circuncisio-
ne: Si circuncidamini Christus nihil
vobis proderit, & capite 6. quasi ad
metam properans, ait, ne quis dein-
ceps mihi molestus sit, ego enim
modò immolor. Ultima habetur
illa ad Hebræos, quæ ex Italia scrip-
ta est, vt testatur subscriptio, & sunt
salutationes Italorum nomine, de
qua suo loco copiosius diximus. Hic
ordō (vt dixi) placet eruditis, ex ve-
teribus habes Hieronymum, in E-
pistolam ad Philemonem Nicepho-
rum lib. 2. cap. 34. ex recentioribus

Bucerum

Bucerum in *προλεγομένοις* in Epistolam ad Romanos, & in eandem D. Hyperium, cuius tamen nondum extant commentaria.

Alter ordo editionis est, qui diligenter à studiosis debet edisci, ut constet, quo ordine se sequatur epistolæ, Item quot capitibus singulæ constent. Prima igitur est illa ad Romanos, capitum 16. Deinde duæ ad Corinthios, prior 16. posterior vero 13. capitū. Sequitur ad Galatas capitum 6. Ad Ephesios itidem 6. Ad Philipenses 4. Ad Colossenses 4. Ad Thessalonicenses duæ, prior 5. posterior 3. capitum. Ad Timotheum duæ. Prior 6. posterior 4. Vna ad Titū trium capitum. Ad Philemonem vnius capitī. Ad Hebreos 13, capitū. Hoc ordine prima est Epistola ad *Ad Ro.* Romanos: id cur sic factum quæstū *cur pre-* sunt rationes. Respondemus primū *"a."*
id cur-

id curiosè fieri. Nam quid si alia prior esset, quid responderent liberum fuit Ecclesiæ iudicium ex cuius consensu hunc ordinem habemus, nec dubitamus quin Spiritus sanctus hoc ita disposuerit, cuius iudicium & voluntas nobis debet esse regula: atque hec apud nos vera, & indubitata debet esse ratio. Huic addimus probabiles. Primum quod in hac Epist. tractetur primaria quæstio, de salute nimirum hominis. eaque copiosius & dilucidiùs explicatur, quā in aliis, hominem non priuato operum respectu, sed fide in Christum iustificari, quæ equidem quæstio, quanuis in aliis quoque tractetur, tamen non ita diffusè, & tanta argumentorum copia. Deinde scribitur ad sedē Imperii & quasi ad arcem mundi, qualis erat Roma, gentium nimirū domina quo nomine digna visa est, ut
lixitate

primum teneret locū. Præterea prolixitate reliquas superat, si non capitum numero: tamen argumenti varietate, & stili grauitate, & quæstionum difficultate, quales sunt de abrogatione legis, de gentium vocatione, de Iudæorum reiectione, de naturæ humanæ excitate, de gentiū sceleribus, Iudæorū pertinacia, de renati hominis operibus, & similia.

De morte Apost. constans est ferē ^{Mors}
^{Praecepit.} totius historiæ narratio, adeoque consensus perpetuus, eum Romæ, sub Nerone, gladio esse percussum. Annus fuit 37. à passione Domini, imperii vero Neronis 14. ut cribunt, Euseb, Hieronimus, Augustin. Niceph. & alii: in qua narratione, tria in primis admiratione digna occurrūt. Primùm quod omnes cōsentienter scribunt Paulum eadem die cum Petro esse paſſum. id affirmat Hieronymus

ronymus in Ecclesiasticis scriptori-
bus. Eusebius lib. 3. cap. 25. Nicepho-
rus lib. 2. cap. 36. & 37. Augustinus li-
bro de consensu Euangelistarū cap.
10. Hinc factum est ut multis proba-
bile fuerit visum, Petrum Rōmā ve-
nisse, & ibi secundum hōcce passum
esse. Alterum quod solus refert Nice-
phorus, Paulum, scilicet, ante mortē
cum Nerone esse colloquiutū, eique
tandem promisisse suum redditum,
tertio à morte die, idque ita conti-
gisse, adeó ut viderit expressā Pauli
vmbram Nero, eā que voluerit ap-
prehendere sed non potuisse. Id si
factū est, indubie ad terrorē Tyrāni
contigit, & ad confirmationem in-
nocentię Pauli, adeoque ad defen-
sionem veræ religionis. Tertium
huic non dissimile est, quod refert
Augustinus in oratione quam ha-
buit de sanctis, Paulo et Petro, quòd
scilicet

scilicet in decollatione Apostoli Pauli , pro sanguine lac eruperit , quod faciebat ad innocentiam eius, si ita contigit. Cæterūm ut multa ad rerum miracula conficta sunt antiquitus, fortasse hæc quoque in illo censu haberri possunt. Sepultus est *Sepulchrum* Romæ in via Ostiensi, iisdem, auto-ribus, quos suprà retulimus, quod confirmat etiā hodie publicus consensus.

QVIBVS SIT SCRIPTA

Epistola.

Scripturam Romanis, id est fidelibus, qui tū temporis Romæ ex Iudæis & Gentibus Christum erant amplexi. Non enim cogitare debes, senatum, populum , & Imperatorem hīc contineri, qui serò tandem ad Christum conuersi sunt, sed misellā quādam turbam, & bona parte constanter ex exilibus & peregrinis, de

*Locus. 1
quibus sit dedi-
cata Epistola.*

quibus Apost. audierat, eos bene, & feliciter esse institutos, nec dū vide-
rat, sed tamē ad eos proficiisci decre-
uerat hinc in Hispaniam iturus. Ita-
que prius & confirmat in fide, & si-
Chrysostomus. bi reddit familiares. Porrò per quos
his Romanis prædicatum fuerit E-
uangelium, hīc etiam quæri solet,
cùm certū sit Apostolum & docto-
rem gentiū Romam nondum per-
uenisse. Quidam respondent hoc à
Petro factū esse, qui 2. anno Claudiī
Imperatoris venerit Romā, & non-
nulos ibi conuerterit. Sed mallē hoc
tribuere Andronico & Iuniæ. Nam
infra 16. cap. inter Apostolos nume-
rantur, & quidē primarios, qui ante
Paulum in Christo fuerint. Romæ au-
tem erant eo tempore, cùm scribe-
retur Epistola, quod ibidem cōstat,
ideo probabile est, illos ibi docuisse.
Quòd si ne hi quidem hoc fecerunt
parum.

parum interest: posuerint ne alii fūdamenta prima, quibus hi superstruxerint, quod ædificium Apostolus Paulus postea confirmauit. Cæterū nobis etiam scripta est, sumus enim Imperii Romani reliquie, & ex gentibus quoque conuersi. Eleganter inquit de Roma Ouidius.
*Ouidius,
ns.*

*Gentibus est aliis, tellus data limite certos:
Romana spatum est urbis & orbis idem.*

Quod si ita est, ad nos certè pertinet hæc Epistola, & ad totum orbē. Vbiique enim sūt dissipati Romani imperii quasi membra. Et quanquā nec sedem, nec fidem Romanam, qualis hodie est agnoscamus: tamen hanc doctrinam sequimur, quam Apostolus Romanæ ecclesiæ suo seculo commendabat, fidem scilicet in Christū, cuius vnius merito, nos profitemur iustificari, secus quam hodie, qui sedem Petri occupant, &

C.J.

Romanæ Ecclesiæ tenent gubernacula.

OCCASIO.

*Occasio
Episto.
la.* Hactenus de personis, nunc rerum locos explicemus, inter quos ordine primus est, qua occasione, scripta putetur epistola. Oblata occasio multis videtur & recte, forte tamen non eadem de causa: nonnulli enim dicunt propter falsos doctores subin gressos, qui lynceritatē doctrinę cor rumpebant, scriptam esse. Asserebat isti sine legis obseruantia, & circum cisionis usu, Christum nihil prodes se fidelibus. Sed in tota Epistola eius non fit mentio, tantum cap. 16, hor tatur ut caueant dissidiorū autores, magis scilicet metuens corruptelam apud eos, morum, quam doctrinæ. Deinde i. capite doctrinæ puritatē illis tribuit, ideo illa occasione non videtur scripta, sed potius hac, quod fides.

Fides ipsorum ab omnibus laudatur, ideo in eadē eos confirmare voluit: huc facit quod ibidem **cupit** illos videre, ut illis impertiatur aliquoddonum spirituale, & mutuam inde accipient consolationē. Deinde est etiam hoc modo oblata, quod ab aliis Ecclesiis rogatus videtur id facere, quō faciunt salutationes yltimo capite tam anxiæ, Ecclesiarū gentium, quæ Romanos salutant, quo satis indicat Asiaticas Ecclesias, & Europeas per Græciam singulari amore Romanos esse prosequutos, neque alia de causa, nisi propter similitudinē fidei, vnde stimuli ad scribendum orti sunt. Porrò videri potest etiam quæ sita occasio, nā in certū est, Spiritum sanctum in Apostolo hæc agere, qui respexit ad illud, ut extaret aliquid scriptum perfectius & absolutius, de præcipuis articulis

religionis Christianæ , ex quo sciri posset, quod posteritati sentiendū esset de tota religione.

Tale opus ad Imperii sedē consultō misit. Hoc sit probabile, si hanc Epistolam cum reliquis conferas. Nā certum est, in hac, causam iustificationis copiosius, & diligentius tractari, in reliquis non pari diligentia & copia, quamuis perstringatur.

ARGUMENTVM

Epistolæ.

Romanos quos nondum viderat Apostolus, confirmat in vera Christi cognitione, docens quid sentiendum sit de præcipuis nostræ religionis articulis, de operum dignitate apud Deum, tum quæ præstabat gentes, ex morali disciplina, tū quæ præstabat Iudæi secundū legem Mosis. Item quid sentiendum sit de peccato, & contrà, de fide, gratia, de veris causis

causis iustificationis, de vocatione gentium, de reiectione Iudæorum, de renati hominis operibus, aliisque locis. Tandem pia, & copiosa salutatione concludit Epistolam.

PROPOSITIO generalis.

Quæstio principalis est de Iustificatione, quam Iudæi tribuebant operibus legis Mosaicæ, contrà Gentes virtutibus moralibus, & naturali cognitioni, quam habebant de Deo, aliisque rebus: & ita quod Christo debebatur, totum ascribebatur operibus. Cōstituatur igitur propositio hoc pacto. Homines iustificātur nō aliqua dignitate, aut respectu operū suorū, sed merito Christi gratuito, fide scilicet apprehendere misericordiam Dei.

CONFIRMATIO Confirmatio propositionis dep̄det G.ij.

ex vi syllogismi disiunctiui hoc pa-
eto. Aut iustificamur operibus: aut fi-
de. Totum connexum, vt vocant,
Συνημμένον verum est, quia constat
ex duabus propositionibus disiuncti-
uis immediatis, in quibus non po-
test dari tertium. Assumptum verò
remotionem habet primæ partis
totius cōnexi, & in hac latet contro-
uersia, ideo huc incumbit tota pro-
batio, inde nascitur specialis propo-
sitio negatiua, Homines non iustifi-
cantur operibus probatio est, quia
Ethnici, qui præstante de Deo ha-
buerunt cognitionem, & moraliter
videbantur iustissimè viuere, tamen
nō possunt iustificari operibus corā
Deo, ita nec Iudei ex operibus legis,
licet diuinitus data sit, coram Deo
iustificari possunt. Argumentum,
valet ex plena diuisione, in qua re-
motis partibus omnibus, remoue-
tur

tur totum, plena autem diuisio est,
qua distinguit homines in Græcos
& Iudæos, & vtrique operibus iu-
stificari non possunt, sequitur ergo
hinc principalis conclusio primi syl-
logismi: ergo fide iustificantur, quæ
erat altera propositio totius cōnexi,
& quidem vera. Porro à tota propo-
sitione disiuncta, ad alteram eius
partem remota prius altera, valeat ar-
gumentum.

STATVS.

Statum constituo definitiuū, quia definit Apostolus in quanam re consistat vera iustificationis causa, quæ valeat coram Deo. Definitiuā quoque hīc sūt alia, vt quid sit Euangeliū, lex, gratia, peccatum, mors. Itē quæ sint opera renati hominis, de quibus omnibus, quia Apostolus ve-
rā & indubitatā pronūtiat sententiā,

meritò definitiua constitutio haberí
debet.

GENVS.

Genus multiplex est, sed principale & prædominans omnino est Demonstratiuum. Nam summa certitudo profertur de articulo iustificationis, quæ aliunde non constat, quæ apodixi, sed meminisse oportet hanc esse γεράφική hoc est, quæ nititur oraculis diuinis : non est λογική quam relinquimus Philosophiæ, & conficitur certa quadam rerum Analogia. Accessoriâ deinde genera hinc considerentur, quæ illustrant principale, & illud confirmât, aut certa saltem ratione ei inseruiūt: quale est Systaticum, quo se Romanis cōmendat, Romanos itidē cōmendat Deo, & in fine sanctos ipsis tanquā fratribus itidē commēdat. Gratulatoriū, quo illorū fidē laudat, & ipsis ob syncerita
tem

tem fidei cōgratulatur. *Ἐπιτημητικός*, quo inuehitur in scelera: primū in genere mortaliū omniū: deinde spe ciatim in flagitia, Ethnicorū, & su perciliū Iudaicū: in sūma omnes de gradu dignitatis deiicit, ac Christo pauidos adducit, in quo omnes cō iungit. Paræneticū quo hortatur ad bonorum operū studium, & commendat renatos à nouis virtutibus Spiritus sancti, *Εὐχτικός* quo facit vota pro piis, & indesinenter orat, ut in primo capite. Item quo optat ad Romanos venire, sic in fine votum repetitur, & similia.

PARTES EPISTOLÆ.

Partitio aut sumitur à præceptis artis, aut à subiecta materia quæ explicatur. Præcepta artis has nobis proponunt partes. Titulum, qui constat persona scribentis, & eius ad quem serbitur, illis additur su-

auis comprecatio , & solet in sacris literis inseri s^epe prolixior aliqua tractatio de vocatione, aut de gene- re doctrinæ, quod in primis seruauit Apostolus Paulus. Deinde est exordiū. Tertiò propositio. Quartò Nar- ratio , aut confirmatio , vel confuta- tio, aut simile. Quintò salutationes, seu Epilogus aliquis. Sextò demum subscriptio de loco , internuntio aut persona scribente aliquid conti- nens: sic quidem artis præcepta con- stituunt. Materia verò s^epe hæc va- riat, vt in haec epistola, si ad materiā respicias illas habebis partes . Prima est, Homines non iustificari operi- bus , quæ tota constat remotione. Altera , Homines iustificari fide, to- ta hæc constat assueratione. Tertia, meritum Christi pertinere etiam ad Gentes, a quo Iudei exciderint bona parte , proprio quodā vitio. Quar, ta, rena-

ta, renatos homines professionem suam ornare omni bonorum operum studio. Quinta demum, sequuntur salutationes & commendationes vice Epilogi. Sed connectamus ordine partes omnes hoc modo. Primum Epistola habet iustam epigraphen, hoc est, titulum. Secundo loco habet exordium Eucharisticum, cui additum est votum. Tertio loco est Protasis: Homines secundum doctrinam Euangelii iustificandos esse, non secundum doctrinam hominum, hanc sumo ex primo capite, vers. 16, & 17. Quarta pars est Anasceue, hoc est confutatio, homines non iustificari operibus. Principium confutationis consti-tue, à vers. 18. cap. 1. usque ad ver. 21 capitum tertium. Quinta pars est Cata-sceue, confirmatio, cuius propositio est affirmativa nos iustificari fide in

Christum. principium illius à vers.
 21. capit. tertii, continuatur per cō-
 sequentia capita, vsque ad principiū
 9. capit. Sexta igitur pars est ἀπολ-
 λωσις hoc est, declaratio totius dispu-
 tationis. Nam cùm docuisset Gentes
 non iustificari operibus moralibus,
 & tamen iustificandos, operæ præ-
 trium fuit explicare locum de voca-
 tione gētium. Sic cum docuisset Iu-
 deos non iustificari operibus legis,
 ipsis datis necessariū erat ostendere
 cur reiecti sint Iudæi. Hoc igitur ar-
 gumentum ad lucem disputationis
 tractat 9, 10, & 11. capitibus. Septima
 pars igitur est deinceps, Parænesis sci-
 licet ad opera nati hominis: ostendit
 enim quid pii debeat, tū proximo tū
 magistratui, tū domesticis. Itaq; hic
 concurrūt loci Ethici, Politici, & œ-
 conomici & quædā adiaphora, tra-
 ctatur hæc cap. 12, 13, 14, & principio

15. Octaua pars constituatur cap.15.
ver.15.estque Epilogus,in quo agit
de rebus priuatis,vt quod se excusat
de prolixitate:Itē quod cōmēdat fra
tres,addit præterea amicas,& copio
sas salutationes,resalutationes,atque
illa usque ad finē explicātur. Ultimo
loco est Hypographe, subscriptio,v
bi admonemur de loco scriptæ Epi
stole & de internūtio,quāuis ista nō
à Paulo, sed ab aliis addita videātur.

DE UTILITATE scripti.

*Loci primarii, qui ad utilitatem declarandam
faciunt presentis Epistolæ.*

Meritò haberi potest compendium
nostræ religionis hæc Epistola,quā
doquidem præcipuos locos & ma
ximè necessarios perspicuè explicat,
de quorum numero aliquos per
stringemus. Et statim quidem in
titulo locus illustris est de vocatio-

ne Apostolica: item de antiquitate
& dignitate Eu angelii. Sic duo sunt
illustres loci, de vtraque Christi na-
tura: humana, quam duxerit secun-
dum carnem ex semine Dauid: &
diuina, secundum quam sit declara-
tus filius Dei potéter ex resurrectio-
ne. Deinde in Exordio locus illustris
est de synceritate fidei ecclesiæ Ro-
manæ, deinde locus est etiam de cu-
ra Apostolica pro ecclesia Romana.
non in defendendis feudis & priui-
legiis, sed pro synceritate fidei. In
propositione loci sunt, primùm il-
lustris definitio Euangeli, deinde
de iustitia Dei, item de fide. In con-
futatione occurunt loci, de ira Dei
contra peccatum, de gentium corru-
ptela, de cognitione Dei illustri a-
pud gentes, de Iudæorum induratio-
ne, de legis trāsgressione, & eiusdem
impotētia, de circumcisioñis natura,
de

de præputii conditione, de Iudæorum propriis quibusdam sceleribus, de æquata sorte omnium mortaliū. Transeamus ad confirmationē vbi loci occurrūt. Primū de iustitia, quæ est ex fide, & de iustitia, quæ est ex operibus, de gratia, de prædestinatione, de promissionum certitudine, & quod sint vniuersales, de dilectione Dei, de origine peccati, & unde sit illius cognitio, de vsu legis, de electione diuina, de renatorū moribus & natura. Sequitur disputationis declaratio cap. 9. vbi loci occurrunt insignes. Primum de veteris populi prærogatiua, quibus mox subiicit locū de Vocatione gétium, item de Iudæorum reiectione, de iure electionis diuinæ, de prædestinatione & eius viribus. Postea capite. 10. ocus copiosius tractatur de reiectione Israēlis, de gratia Dei, quæ vera

causa est electionis, & iustificatio-
nis. In Parænesi loci sunt admodum
multi, ac commodè distinguntur in
tres ordines. Sunt enim Ethici loci
quales propriè considerat Euangeli-
um, de concordia, de consensu in ar-
ticulis fidei, de fraterna dilectione,
de diuersitate donorum, & legitimi-
mo illorum vsu, de diligendis etiam
inimicis. Deinde Politici sunt, vbi
tractatur ius Magistratuū, de cōditi-
one subditorū, de rerum proprietate
de publicis oneribus, de tributo,
censu & huiusmodi, de honorandis
præsidibus. Addūtur istis capite 14.
noui qui ad Ethicos pertinent, vt
de tolerandis infirmis. Sequuntur
deinde Adiaphora, vt quid sentien-
dum sit de cibo, potu, diebus festis,
& similibus locis. Capite 15. & de ar-
rogantia fidelium, qua solent con-
temni debiliores, qui locus iterum
ad

ad Ethicos pertinet. Postea sequitur Epilogus, qui continet elegantes locos, ut locus ciuitatis, excusans audaciam & prolixitatem scripti. Deinde locus dignus est scitu, de propagata doctrina Euangeli, temporibus Apostoli. Item locus de peregrinationibus eius. Item de contributione fidelium in usus pauperum. Item locus de intercessione sanctorum, sed quia viui pro viuis intercedunt. Praeterea elegans est locus de more salutandi recepto inter pios. Item commendandi absentibus pios fratres, & ita concluditur Epistola.



DISPOSITIO IN PRIO-
rem Epistolam ad Co-
rinthios.

Qui fuerint Corinthii.



Orinthus dicta fuit à Corinthe Marathonis filio,
qui vel conditor vel illu-
strator fuit vrbis. Olim
vrbium Græciæ fuit clarissima & flo-

*In Ora rentissima, vnde Cicero non dubita-
tione pro Le-
ge Ma- nua.* Idem in Oratione contra Rullū e-
legantissimè describit ipsius situm,
his verbis. Corinthi vix vestigium
relictum est. Erat enim posita in an-
gustiis, atque faucibus Græciæ, sic ut
terra claustra locorum teneret, &
duo maria maximè nauigationi di-
uersa

IN EPIST. PAVLI. 51

uerfa penè coniungeret, cum perten-
nui discrimine separarentur. &c.

Quibus verbis indicat Aegæum ma-
re ab oriente alluere, quo ex Asia ad
nauigantes, Cenchræo portu excipi-
ebantur. Ionium verò esse ab occa-
su, quo ad uecti Lechæo portu reci-
piebantur. Hinc est etiā quod Ho-
ratius cecinit.

*Laudabunt alii claram Rhodon, aut Mitylenæ Horæ
At Ephesū, bimaris ve Corinthi sius.*

Mænia-

Hæc loci oportunitas, & opes, & sin-
gularem morum corruptelā, in hæc
urbem conuexerat. Nam ex tota A-
sia & Europa, quasi ad commune
emporii istuc confluebant merca-
tores. Et erat illic Veneris templum
celeberrimum, in quo mulieres pro-
stítutæ quæstum corpore faciebant,
vnde nobiles illæ meretrices, quas
commemorat Athenæus, & passim
prophani authores, fermè omnes

Corinthiæ fuerunt. Et extat adhuc prouerbia apud authores , quibus mores illorū taxantur, vt Corinthia ci,& nō cuiuis licet adire Corinthū. Ex hac morum corruptela indubiè fluxit , vt iusto Dei iudicio postea sit deleta , quod primū legimus in historiis factū à Romanis, per L.Mū miū , ante bellum Numantinū. Occasio euertēdi vrbem illa erat, quod legatos populi Romani stercoribus fœdasset. Postea tamen restituta est per Cæsarē, & iterū nobilis reddita, studiis humanitatis , opibus, ac morum corruptela. Qui plura desiderat, videat Strabonē lib.8. Liuiū lib.5. de cadis quintæ. Pliniū lib.34.cap.2,& 3 Pausaniā lib.2. & nominatim septimo, qui Corinthiaca inscribitur. Florum lib.2, cap.16. Iustinum historicum libro 34. Eutropium lib.4, & similes scriptores.

OCCASIO EPISTOLÆ.

In hac corruptela morum, domi-
nus quoque Ecclesiā habuit, cuius
origo extat in Act. cap. 18, ex quo lo-
co, & primo cap. huius Epistolæ, &
itidē 7. colligi potest occasio, quod
nimirū graui de causa permotus A-
postolus hāc scripsiterit Epistolā. Oc-
casio igitur fuit oblata hoc modo.
Docuerat ibi Apostolus anno inte-
gro, & sex mensibus, idque magno
fructu & successu: diuinitus enim
iussus hoc fecerat, & simul illi signifi-
cauerat dominus: quod ibi multū ha-
beret populū. Cùm verò hinc in Sy-
ria enauigaret Apost. ingenia quedā
leuia cœperūt omnia in illa ecclesia
perturbare. Quidā enim reprehēde-
bant simplicitatem doctrinæ Pauli-
næ, imbuti scilicet philosophica qua-
dam persuasione sapientiæ & elo-
quentiæ humanæ. Alii in moribus

quiduis sibi licere præsumebant, adeò ut scortatores, ebrios, litigiosos, in cestu pollutos illa ecclesia ferret.

Alii damnabant matrimonium, alii negabant resurrectionē corporum, alii aliis superstitionibus Iudaicis, vel gentili prophanatione, & doctrinā & morum innocentiam perturbabant. His malis perturbati saniores, scribunt ad Apostolum, & cupiunt edoceri de multis. Qua occasione arrepta Apostolus non solùm ad quæstiones ppositas respōdet, sed ad alia etiam multa, quæ ipsis minus vitiosa videbantur, adeoque indigna quæstione. Ex quo satis constat, occasionem illi fuisse oblatam, cùm ad illorum literas primitus ei respondendum esset, & tamen in his non omnia vitiosa mouissent, ipse Apostolus reliqua patefacit, adeoque ab his ducit exordium, hortaturque ut in

vera doctrina, & vitæ innocentia persistant, ac his malis occurrit, ne maior illius Ecclesiæ ruina, illi omnē fructum istic deleret. Priorē partem Epistolæ habuit ex publico rumore, & nominatim ex domesticis Chloë: Posteriorem verò ex ipsis literis Corinthiorum.

GENVS SCRIPTI.

Cùm tota Epistola agat de restituenda concordia publica in doctrina fana, & innocentia morum, rectè referetur Epistola ad Epanorthosin. Corrigit verò & mores, & doctrinā, idque tam in doctoribus, quam in auditoribus. In illis reprehendit supercilium philosophicum, in auditōribus verò persuasionem vanā, quasi sapientia & eloquentia necessaria foret Euangeliō. Hinc alii alios admirabantur, & simpliciores contemnebant, quæ omnia sunt ~~euangelica~~.

Itaque hoc prædominas cōstituimus genus. Huic postea accedūt, quæ superius illustrāt, & tanquā organa trāstationis fiūt: ut Didacticū, quo indicat quid credendū sit, & quomodo viuendū renatis hominibus. Ψευτικὸν reprehensorium, quo taxat illorum ignauia, in ferēdis sceleribus, omnīque morū corruptela. Paræneticū, quo hortatur ad bonos mores intermissos, ad studiū Eleemosynæ, ad cōtributionem pro pauperibus, & in genere ad innocentiam vitæ.

PROPOSITIO generalis.

Habēt singulæ quæstiones, quam multæ sunt, suas speciales propositiones, ut est videre cap. 7, & consequētibus: tamē tota Epistola reuocanda est ad vnā generalē sententiam, tanquā ad scopū. Sit igitur hæc proposiō. Corinthiis omnibus modis curandū

randū est, vt sublati dissidiis, & morū corruptela, consensū in doctrina sibi tradita, & in moribus innocētiā colāt omni virtutū genere, vt imago Dei in ipsis restauretur & perficiatur ad aduentū D. nost. Iesu Christi.

PAR TES.

Divisio variè instituitur in hac epistola: quidā bimēbrē instituunt, nōnulli trimenibrē, vtriq; à materia eā ita distingūt. Qui bimēbrē faciūt hoc pacto procedūt. Prima parte corrigit dissidia, orta ex emulatione doctorū quæ omnia spectat sanę doctrinę restitutioṇē. Secūda verò parte emēdat mores, vt sine offēdiculo fratrū, quāinnocētissimè abulēt. Qui verò trimēbrē faciūt, ita distingūt. Prima parte corrigi in eis vitia, quæ illi minus grauia iudicabāt, & ob id eius iudicium de his nō requisierāt, cum interim essent grauissima, qualia sūt,

studium sectarum , dissidia publica
in dogmatibus religionis , ambitio
eloquentiae , & sapientiae persuasio ,
quasi sine his non recte possit doceri
Euangeliū. Item scortatio, incestus ,
litigandi mos corā infidelibus. Hæc
& familia intacta reliquerant quasi
leuia. Secunda parte demum respō-
det ad illorum quæstiones ab ipsis
propositas, quales erāt multæ de ma-
trimonio, de ciborū delectu, de Ido-
lis, & Idolotycis, de cœtibus ecclesi-
asticis, & an liceret mulieribus doce-
re, & mouere quæstiones in cœtibus
publicis. De cœna domini, & de eius
vero vſu , de donis spiritualibus , &
illorum præstantia , nominatim de
prophetico munere, de resurrectio-
ne mortuorum, de qua multi dubi-
tabant. Hæc omnia pertinent ad E-
pistolam Corinthiorum. Tertia par-
te cap. 16, agit de priuatis rebus quasi
per

per appendicem, quæ ex animo Apostoli fluebant, publico aut priuato bono. Publicum erat, ut quod iubet colligere collectam. Priuatum videatur quod illis promittit suum aduentum. Sic priuatum est, quod addit de Timotheo, Fortunato, Achaiaco, Stephana, & aliis.

Addamus his tertiam partitionem, quæ plenior sit, & superiores complectatur. Sic igitur cohærent partes.

Primo more suo præfigit Epistolæ pigraphen, quæ facit ad benevolentiam, & hanc à sua & Sosthenis persona item auditorum laudibus religiose' captat. Locus primarius est de ordinaria vocatione. Secunda pars est Exordium, quod etiam ducit ab ipsis Corinthiorum laudibus. Nam commendat eos ab his donis, quibus ipsi in primis abutebantur, significas quomodo opotert ipsos viuere. Dein-

de simūl indicat spem emēdationis
nondū penitus esse amissam. Locus
primarius est Exordii, de vera Eccle-
sia, cuius debent extare certæ notæ,
per quas deprehēdi possit, interim in
hoc mundo tamē non caret suis næ-
uis. Tertia pars est perpetua corre-
ctio eorū vitiorū, quæ ipsi videbātur
parū curare, ideoque in suo scripto
hæc præterierāt. Ad Apostolū tamē
peruenerāt rumore publico, & rela-
tione domesticorū Chloæ. Principi-
um correctionis sumitur ver. 10. cap.
Iac cōtinuatur usque ad principium
cap. 7. Loci insignes hic plurimi sūt,
in quibus perstringendis ordine v-
temur capitum.

In primo igitur capite locus est de
fectis & litibus, quæ ex altercationi-
bus nomine doctorū instituebātur.
Apostoli verò mens est homines
Christum professos non oportere
scindi

scindi doctorū nomine, & hac occasione aperit causas sectarū, & de illis tollēdis sedulò agit. Præcipua verò causa erat carnalis opinio eloquētiæ & sapientiæ, vnde agit de eloquētiæ ministri, nimirū illā non usque adeò esse necessariam, sed in illo potius requiri donū Dei, & Spiritum sanctū, qui etiam in abiectis coram mundo efficaciter agat. Vnde locus nascitur de simplicitate doctrinæ Christianæ. Item de discrimine philosophiæ & Euangelii, de sectarum notis, &c.

Capite 2. suo exemplo diffusius aperit discrimen sapientiæ Philosophicæ & Euangelicæ. Concurrunt loci de sublimitate donorum spiritualium, damnari sapientiam mundi coram domino, iudicium de rebus omnibus penes Spiritum Sanctum esse absolutum, &c.

Cap.3. omnia ad personā Corinthiorum applicat, ne scilicet ipsi scindantur propter doctores. Loci sunt de sapientia ministri in docendis rudibus, de ministrorum dignitate, de fundamento Evangelicæ doctrinæ & dignitate piorum.

Cap.4. præoccupatione suum tuer officium, & in genere contendit ministros Christi esse audiēdos, ut vt sint coram mundo abiecti, in cæteris autem non veretur Corinthiorum subire censuram. Loci concurrunt, præter iam dictos, de temeritate iudiciorum, de Apostolilabōribus, & contemptu.

Capite 5. videtur aliud ingredi argumentum. Hactenus enim contra dissidia egit quæ orta erat ex contentione doctorum. Nunc verò corrigit Corinthiorum nimiam lenitatem, qua utebantur in ferendis flagitious

IN EPIST. PAVLI. 9

tiosis hominibus exemplum illustre producit de quodam polluto incestu, quem iubet tradi Satanæ, mox alia quædam vitia corrigit, quæ ipsi ut superiora, parum seueriter coercebant. Loci illustres sunt de incestu, & eius ordinaria poena, de excommunicatione, de disciplina Ecclesiastica, de scortatione, ebrietate, & similes: istis addatur locus de moribus sanctorum.

Sequitur cap. 6, vbi aliud ingreditur locum. Nam h̄c corrigit litigandi morem, coram Ethnicis iudicibus, ac docet piis aut cedendū esse de suo iure ne litigent, aut eligendos iudices ex fidelibus qui litigantes dirimāt. æquissima erat ista correctio, cùm enim litigādi morem non posset simpliciter & in uniuersum prohibere: tamen ex circunstantiis cum damnat, quo mōstrat quomodo hic

mos possit fieri Christianus. Loci sunt de Christiana libertate moderanda , de ferenda iniuria , de litibus forensibus : quatenus scilicet liceat Christiano homini ius suum persequi, de crapula , scortatione, aliisque vitiis eliminandis, de dignitate piorū & similes. Hactenus correcta sunt ea vitia , quæ Corinthii in Epistola præterierant.

Nunc cap.7. constituatur 4.pars, quæ contineat responsionē , qua ad ipsorum epistolam satisfacit. Porro in suo scripto mouerāt diuersas quæstiones, quæ in Ecclesia erāt agitatę, non tamen planè compositæ: ideo ad iudicium Apostoli configiunt, ac probabile est Apostolū quæstionum ordinem ab ipsis propositum sequi. Prima igitur quæstio est de cōiugio. Nascūtur ibi loci de matrimonio, de officio mariti in uxorem, & contrā

contra de officio vxoris erga maritū.
Inde sequitur locus de cœlibatu , locus de secundis nuptiis, de diuortio,
de impari matrimonio, de virginitate,
de vocatione tuenda in qualibet
conditione.

Cap.8.transit ad alias quæstiones,
vbi in genere disputat de ciborum
delectu, ac videtur Corinthii quæsi-
uisse nominatim de Idolothytis, hoc
est, de iis quæ erant idolis immolata
quid de his iudicandum esset. Nam
pii aliquando ad Ethnicorum conui-
via vocabātur, vbi carnes idolis cōse-
cratas edebant interdū ignari, vel e-
tiam admoniti idem faciebant cum
scandalo, aut abstinebant cum scan-
dalo. Respondet ergo Apostolus,
cibos quidem omnes esse licitos: at-
tamē omnem eorū usum limitandū
esse ad charitatis regulam. Loci hīc e-
mergunt, de Idolis, & eorum vani-

tate, contrà de vnitate veri Dei, de conscientia, & eius viribus, de infirmitate fratrum, de libertate Christi ana coërcenda.

Cap.9.suo exemplo docet in rebus mediis de iure suo s̄aþe piis esse cedendum. Hoc enim fecit Apostolus in iure coniugii, cum posset vxorem secum circunducere more aliorum, hoc tamen non fecit. Sic in stipedio accipiendo, non est usus eadem libertate, qua vti poterat. Sic in carnium esu respiciendum est quid ferat fratrū imbecillitas, non quid dictet libertas, & Apostolus sanè in commodum fratrū libenter semper vult abstinere. Locus primarius est, *ædificationem* omnia ad *ædificationem* esse ac commodanda. Item ministris licere viuere ex Euangeliō, quo tamen iure non semper sit vtendum.

Cap.10, exemplo veteris populi
de

deterret à scortatione, idololatria, & similibus vitiis. Loci concurrunt de Analogia sacramentorum vet. populi & noui, & specialiter locus de Baptismo, de cœna Domini, de pœnis scelerū, idololatriæ, scortationis, inobedientiæ, & similiū. Tandem locum repetit de delectu ciborum.

Cap. ii. agit de vitiis, quæ specialiter irrepserant in sacros cœtus, & ostendit conuentus tales oportere decenter & ordine congregari. Loci sunt de decoro mulierū, de decoro virorū in cœtibus, in primis locus grauissimus, de vero usu cœnæ dominicæ.

Cap. 12. disputat de usu donorū spiritualium. Nam de iis quoque contendebant, dum alij alia præferrent. Ostendit autem Apostolus, omnia dona ad unius Christi gloriam dirigenda esse, nec oportere hinc petere dissidiorum materiam. Loci sunt

de donorum varietate , de sympathia membrorum in humano corpore.

Cap.13. differit de præstantia charitatis, ad quam omnia dona spirituallia sunt referenda. Concurrunt loci de linguis, & in genere de imperfectione in hac vita.

Cap.14. de dono linguarū & prophetiæ specialiter agit, & contra quā Corinthii æstimabāt, præfert Prophetiæ donū linguis, & quia in hac parte illorū cœtus laborabāt in hac ἀπεξίᾳ quadā, nominatim prohibe ne mulieres publicè doceāt, imò ne quidē habeant potestatē interrogandi in cœtibus publicis. Concurrunt alii loci, vt de cátu ecclesiastico. &c.

Cap.15. corrigit praua dogmata in quæstione resurrectionis , hanc alii prorsus negabant, alii de illius forma scrupulosè inquirebant, alii aliis pra-

uis opinionibus erant infecti, ideo
Apostolus docet τὸ δὲ πότε quòd sit fu-
tura, item qualis sit futura. Obiter e-
tiam ad finem hortatur ad constan-
tiam. Hactenus 4. pars, qua respon-
det ad illorum scriptum.

Capite 16 quinta instituatur pars,
quasi Epilogus. Agit autem de priua-
tis, primum de instituenda collecta,
more aliarum ecclesiarum. Deinde
agit de rebus propriè ad se pertinen-
tibus, ut de suo aduentu, item de ad-
uentu Timothei, & de eodē etiam
honorando, item de Stephanæ fami-
lia, Fortunato, Achaico, & similibus
fratribus. Huic salutationes subiicit,
publicas & priuatas.

DISPOSITIO POSTERI-
oris Epistolæ ad Corinthios.

Qui fuerint Corinthii.

Orinthus olim Achaicæ fuit metropolis, & vt Cicero inquit, lumen totius Græciæ, adeoque in ea æstimatione, vt Imperij autoritatem, & nomen sustinere posset, quales veteres Romani tres solùm vrbes computabant, Carthaginem, Corinthum, & Capuam. Ad quam sanè rem magna erat cōmoditas ex loci oportunitate, cum inter duo maria Ægeum & Ioniū posita esset, vnde quamvis de Imperio certare non potuerit, celeberrimum tamen emporium exhibuit Asiacæ & Europæ, & simul vt sit in maritimis emporiis, singularem admisit morum corru-

corruptelā. Quod eò facit, vt intelligamus magnāesse Dei misericordiā, qui in tanta istorum ciuium corruptela, voluit sibi etiam congregare ecclesiam, eamque admodum florētem, ad quam scribitur etiā præsens epistola.

OCCASIO EPIS- TOLÆ.

Occasio nata est ex malevolentia aduersariorum Pauli, qui more suo omnia dicta & facta Apostoli rapiebant in deterius, in primis ea quæ in epist. piè ipse monuerat, & cādide promiserat, vt quod cap. 5. seueriter iusserat illum incestu pollutum tradi Satanæ, id aduersarii mirificè exagita bāt quasi dictum hominis ambitio- si, & censoris nimiū seueri. Sic quod vltimo cap. promiserat suū aduentū, quem impeditus variis persecutio- nibus non potuit præstare hoc ra-

piunt aduersarii in calumniam, & ar-
guméatum leuitatis, quasi aliud stans
aliud sedens diceret, homo esset faci-
lis in promittiédo, nō perinde in cō-
plendo. Eodē pacto alia multa rapie-
bant in contumeliam, quasi Aposto-
lus dominationem qua rareret, & au-
thoritatem nimiā peteret, legem e-
uerteret, homines carnales & disso-
lutos efficeret, imperiosus nimiū in
scribendo esset, cum interea persona
esset abiecta, & contemptibilis. His
& similibus calumniis diligenter in
hac epist. occurrit, & apud eosdem
causam disceptat, apud quos hostes
illum imprimis lædebant.

GENVS SCRIPTI.

Ex occasione facile iudicari potest
de genere. Quáquam enim mixtum
sit genus scribendi: tamen principale
est Apologeticum, quod constat ac-
cusatione, & calūniarū depulsione,
& ob

& ob id pertinet ad iudiciale. Purgat autem se imprimis cōtra crimen leuitatis, asperitatis, ambitionis, inconstantiæ, & cauponationis in docendo, qui affectus erat carnalis, doctrinam accommodare ad priuatum quæstum, quæ omnia ita diluit, ut ostendat dilucidè hæc omnia multò magis aduersariis competere.

Huic prædominantī generi accedunt, quæ huic subseruiunt, & sine quibus commodè tractari non poterat defensio. Primū συστημὸν, quo pasim de suo in Corinthios amore, aspersa etiam sui & Titi & similiūm cōmendatione quā opportunè hinc inde interserit. Deinde ὥστε πατέται, ubi monet Corinthios officii, ut in hominis renati moribus persistant, nec admittat falsa de præceptore iudicia. Hinc nascitur etiam επαυγεπνόδον, quo palam agit de propriis

laudibus. Quæ omnia eò faciunt, vt
cōstet se innocenter traduci à male-
uolis, adeóque se non dubitare suam
vocationem & in docendo synceri-
tatē, simūlque genus doctrinæcum
summis aduersariis conferre.

PROPOSITIO PRINCI- palis.

Hic statuatur propositio princi-
palis. Apostolus Paulus nulla leuita-
te in promissis, aut dominādi studio
quicquam scripsit, nulla etiam ambi-
tione quicquam docuit, sed singula-
ri erga Corinthios amore & benefa-
ciendi studio, omnia & scripsit &
docuit.

D I V I S I O.

Membra hoc ordine cohærent.
Principio est Epigraphe more cōsue-
to, quæ cōtinet personas, addita bre-
ui comprecatione. Locus vt in
superioribus, est de ordinaria voca-
tione

tione , quam vrget contra calumniatores. Secunda pars est exordium versu 3. quod ab ipsa causa deducit. Cūm enim vellet monstrare, quibus de causis impeditus non venisset , à gratiarum actione exorditur, Deo pro defensione liberali in tot malis gratias persoluens. Loci sunt de afflictionibus piorum, & earrundem fine ac vſu: item de consolationibus diuinis, & alii. Tertia pars est Narratio , versu octauo. Hæc propriè spectat ad Apologiam , explicat enim causas impedientes, quæ cùm sint grauissimæ, non potest accusari leuitatis etiamsi præter promissum non venerit. Huic loco concurrunt alii, vt ex superioribus, locus de afflictionibus: itē de intercessiōnibus piorum , in aduersis de vera gloria sanctorum, & similes, qui primo capite absoluuntur.

Cap.2.diluit crimen asperitatis,cui concurrebat crimen tyrannidis. Ideo differit initio de vſu tristitiae ipſis illatæ vt explicaret finem ſeu erioris scripti,mox ſentētiam excommunicationis latam ſup. cap. 5. mitigat, hortatúrque Corinthios vt excluſum recipiant, ne à Satana præoccuperetur . Loci ſunt de triftitia, & eius commodis,de condonatione fraterna, de ſuccesſu Euāgelii, & eiusdem impedimentis,de cauponatione verbi Dei.Cap.3.agit contra crimen oſtentationis , à quo ſe alienum facit , vel iſorum Corinthiorum testimonio, quorum ecclesia adeò feliciter iſtituta cōmendabat p̄ceptoris fidem, & ſynceritatem. Hunc locum eleganti digreſſione amplificat,inſtituta collatione inter Christum & Moſen. Loci ſunt de vera & pia iactantia, de ſpiritu & litera,de p̄tantia noui

noui Testamenti, de cæcitate Iudæorum in lectione Mosis, &c.

Cap. 4. persequitur fidem in docendo, quod discit. nulla ambitione ductus, docuerit, sed omnia semper ad Christi gloriam dirigat, quod pertinet etiam caput 5. Loci insigniores sunt de sinceritate pii doctoris in docendo, de cæcitate impiorum, de iudicio sanctorum, de morte, de reconciliatione totius humani generis in Christo, & alii multi. Et hactenus quidem Apologia, per ista 5. capita.

Quarta deinceps sequitur pars, à capite 6. quæ iam non tam pertinet ad personam, siue doctrinam Apostoli, sed potius ad Corinthiorū officium. Videtur enim omnia sequentia ~~ταπεινη~~ esse præsertim cap 6.8. 9. Nam 6. capite hortatur eos ad varias virtutes, etiam suo proposito exemplo. Vnde totidem nascun-

tur loci quot numerantur virtutes.

Cap. 7. sui & Titi habetur commēdatio, & plenior etiam excusatio sententiæ excommunicationis , quam suprà capite secundo quoque excusauerat.

Cap. 8. & 9. agit de collecta facienda ad quā & rationibus & exemplis eos conatur excitare.

Cap. 10. instituatur 5 pars epistolæ. Quæ locum habet de propriis laudibus , qui facit contra eos qui humilitatem personæ Paulinæ in cōtemptum vocabant.

Quare cap. 10. incipit asserere auctoritatē suam, etiam fine expresso, quòd scilicet faciat ad ædificationem nō ad destructionem. Quod ipsius maleuoli non recte seruabat. Nā illi quoquo modo mordicus tuebantur dignitatem . Illustris locus est de

de propriis laudibus: item de vi ob-trectationis, item honestam sui de-fensionem esse concessam.

Cap. ii. modest' e ipsis iniicit suspi-cionem, quasi non manserint in sim-plicitate fidei, hinc redit ad suas lau-des, séque confert cum summis ad-uersariis, & mox percurrit prolixè e-as laudes, quas sibi seriò potuerat tri-buere, præsertim varias & multas persequutiones, à quibus maleuoli sibi studiose cauebant. Loci iidem sunt insignes, qui iam enumerati sunt, quibus accedunt, locus de vera æmulatione, item quod gratis do-cuerit.

Capite 12. idem adhuc persequi-tur argumentum usque ad versum 14. Itaque eo loci constituatur sex ta pars, quæ tota est denunciatoria. Nam primitus suum iterū promittit aduentum, ne putarent sententiam.

à se esse mutatam. Haç occasione ostédit qualē sint ipsum habituri, im-poenitentes certè seuerum, pœnitentes verò nihil Paulo clementius & humilius. Huc pertinet principium 13. capit. Deinceps versu II. septima pars constituatur, quæ breuem continet Epilogum. Constat autem ille cohortatione, salutatione, compreca-tione, & ita totam Epistolam con-cludit.

DISPOSITIO EPISTOLAE ad Galatas.

Qui fuerint Galatae.

 Alat̄x Asiatici fuerūt po-puli, originem ducentes ab Europeis Gallis, quos Græci Galatas appellabant, tum etiam Celtas nomen indu-biè adepti, ἀπὸ τοῦ γαλατοῦ, hoc est, à lacte,

lacte, quandoquidem haberent corpora magis candida, nec more Italorum aut Hispanorum fusca, nec Asia ticorum instar denigrata, vnde Germanorū fratres dicti sunt, quod magna esset inter eos corporum similitudo. Quomodo autem ex Europa in Asiā transierint, & fedes illic tandem obtinuerint inter Bithyniam & Cappadociam, vide Strabonem lib. 12. Plutarchum in vita Camilli, Iustinum lib. 25. statim ab initio, Liuium lib. 8. decadis quartæ, Plinium lib. 5. cap. 32. Dicti sunt Gallogræci, quod mixtim illa terra tum à Græcis, tum à Gallis coleretur. Ab Oriente habuerunt Cappadociam, & Halim fluum: ab Occidente, Bithyniam, & Asiam: à Meridie, Pamphyliam: à Septentrione Pontum Euxinum. Ad hos Gallos, seu Gallogræcos, aut etiā Galatas bis venit Apostolus, primò

F.j.

prohibuit illum Spiritus ibidem loqui, quod nimis vocaretur aliò, ut est capite 16. in Actis. Secundo iterum eos conuenit, cap. 18. Actorum, quo te mpare eis diligenter exposuit fidem in Christum, docens nos misera Dei gratia per Christum saluos reddi, sine obseruatione ceremoniarum legis, adeoque ipsius circuncisionis. Nec defuit successus: nam non solum unam Ecclesiam, sed plures, & vt apparet florentes in ea regione instituit, vt patet ex epigraphe.

OCCASIO.

Occasio scribendi hanc Epistolam planè fuit oblata à Pseudodoctoribus. Nam post discessum Apostoli ex Galatia, homines vanis opinionibus imbuti multa cœperunt in illis Ecclesiis innouare, adeò ut reducerent ritus Iudaicos, circuncisionem, temporum & ciborum discrimina

crimina, obseruationem nouilunii,
 & neomenię, quę omnia implicata-
 tem doctrinæ Euangelicæ corrum-
 pebant. Ac vt illa apud auditores ob-
 tinerent, non abstinebant à calumi-
 niis, quibus ipsum Apostolum con-
 temptim traducebant. Quòd cum
 Christo non vixisset in carne, nec illi
 esset conuersatus, & reliquos Apo-
 stolos non audiuisset, qui contra mo-
 ré Pauli circuncisionē non reprehé-
 derēt, & alia legalia obseruarēt. His
 & similibus, & personā & doctrinā
 Apostoli lædebāt. Hinc motus hanc
 scripsit Epistolam. Primum, vt corru-
 ptelas admissas emēdaret. Deinde ip-
 sis patefaceret quales iā haberēt do-
 ctores, impostores sc. & corruptores
 Euāgelicę veritatis. Demū vt se & do-
 ctrinā suā ab istis calūniis tueretur.

GENVS SCRIPTI.

Cum sanā feniēl receperāt doctrinā

F.ij.

& passi erant synceritatem illius corrumpi in eius restitutionem incumbit tota Epistola, ideo ad Epanorthosini pertinet. Certū enim est scopum hunc esse, corruptelas corrigere, quę nisi incidissent, non erat scripturus talem Epistolam. Præcipuæ autem corruptelæ erant, quod quidam passi essent sese circumcidī, quasi esset necessaria circuncisio ad salutē, alii temporum & ciborū delectum obseruabant, ac si sine his salui fieri non possent in Christo. Accedunt huic specialia quibus correctio commodi tractatur, ut Apologeticū, quo se suāmque personam defendit, & monstrat quomodo cum Apostolis cōuersatus sit. Deinde accedit etiam Ψευτήριον, ut capite 1.3. & 4. videre est, quo illos grauiter taxat, tanquā stultos, superstitiones, inconstantes, & nimium faciles ad lapsum. Quædam sunt

sunt διδασκαλία, quibus confirmat iustitiam fidei, contra operum merita, & circucisionis dignitatem. Item quo docet legis necessariam abrogationem: ut est videre capite 2.3.4. & partim 5. Accedunt etiam quædam προτρεπτικά quibus grauiterhortatur ad bona opera, & officium regni hominis, item ut reuertantur ad eam simplicitatem doctrinæ, quam à Paulo acceperat. Præterea sunt quedam ἐπανεργά quibus laudat Galatas, ut capite 4. quod illum accepérant quasi Angelū Dei. Item quædam προπανεργά cap. 5. ubi admonet de necessariis virtutibus.

PROPOSITIO.

Propositio duplex consideranda est, prior personalis est, ideoque specialis, & ad hanc tota respicit Epistola. Nimirum quod Galatæ in simplicitate Paulinæ doctrinæ debuerint

constanter perdurare , nec sese ita faciles præbere seductoribus ad defec-tionem. Huc respicit iam tota argumen-tatio, ut quod in titulo ostendit se non ab hominibus, neque per hominem vocatū esse , sed ab ipso Deo per Christum. Itaque minimè debu-istis à mea doctrina deficere. Deinde in exordio à persona nouorum do-ctorū, qui vos, inquit, perturbāt, con-tra mentem Christi , non o introduc-to Euangeliō: itaque minimè erant audiendi. Sic in Narratione ab auto-re suae doctrinæ idem contendit, qui est ipse filius Dei. Itaque non erat ita facile desideranda . Item quod in ea-dem Narratione habetur , quod sua doctrina postea ab Apostolis nulla ex parte sit correcta; cùm imprimis eo nomine Hierosolymā esset pro-fectus. Item quod ipse Paulus potius correxerit Petrum , idque in obser-vantia

uantia legalium , quæ legalia Galatæ iterum admiserant Iudaico more. Et hanc correctionem Petrus æ quo animo tulit. Atque hæc prior est propositio. Altera est, quæ ad ipsam causam pertinet, & ob id generalis potest dici. Quæritur enim hîc de genere doctrinæ , quod apud omnes ecclesiæ valere debet , scilicet fide in Christu[m] mera Dei gratia, non operibus legis, aliisve ceremoniis nos iustificari. Hæc deinceps tractatur capite 3.4. & 5. quamuis hinc inde primo & secundo capite quoque aspergatur superioribus. Et hanc propriè opponit aduersarij doctrinæ, eamque confirmat validis rationibus . Loci insignes sunt de iustificatione per fidem, de natura legis, circuncisionis, de bonis operibus, aliisque, &c.

DIVISIO.

1. Membra sic connectantur. Initio titulus est, qui more solito cōstat subscriptione, inscriptione & salutatione. Inseritur locus de sua vocatione, quod immediate à Deo ad hoc munus docendi accesserit, & attingitur principalis propositio, quod Christi morte simus redempti à peccato secundū m voluntatem Dei Patris, quod nihil aliud est dicere quam quod in secunda propositione explicuimus. 2. Secundo loco sequitur exordium quod sumit ab admiratione noui lapsus. Nam reprehendit in eis facilitatem. Hoc loco statuitur propositio prior, non debuisse deficere ab eo genere doctrinæ, quod à Paulo acceperant. 3. Tertio loco subneicitur narratio, in qua agit de rebus suis, hoc est, de sua vocatione, doctrina, peregrinationibus, con-

gre-

gressu cum reliquis Apostolis, cōuer-
satione cū Petro, eiūsq; lapsu, & re-
prehēsione sua, qua simulātē & dissī-
mulantē castigauit. Quarto loco sta-
tuitur πρότασις, propositio totius cau-
ſæ, quod scilicet fide in Christū, sine
operū dignitate iustificemur, id pro-
ponit capite 2. versu 16. & nonnihil
explicat vsque ad finem illius capititis,
additis rationibus more suo. Quinto
loco sequitur κατασκευὴ confirmationis,
principio 3. capititis. Continuatur propositionis confir-
matio per totum caput 3.4. & prin-
cipium quinti cap. Sexta pars conti-
net ἀπαίνεσθαι, quæ superioribus an-
nectitur per præoccupationem cap.
6.versu 13. Locus totus est de doctri-
na operum, de dilectione proximi,
de fructibus spiritus & carnis, de le-
nitate erga infirmos exercenda, de
viectu quem ecclesiæ debent piis do-

ctoribus, de libertate Christiana moderanda , de beneficentia in pauperes: producuntur hæc usque ad verum ii. capit. 6. Septima inde pars cōstituatur. Epilogus scilicet, in quo pauca quædam repetit de ingenio malorum doctorum, quorum opera circuncisio & alia legalia illis erat obtrusa, de vera gloria, de sua conditio-
ne, & cupiditate hinc emigrandi: atque hæc generalia videntur. Ad finem breui cōprecatione totam concludit Epistolam.



D I S P O S I T I O

Epistolæ ad Ephe- sios.

Qui fuerint Ephesi.



P H E S V S ciuitas po-
sita est in littore maris I-
onii , spectans ad Occa-
sum

sumi minoris Asiæ , olim amplissima
mercatu, & Dianæ cultu admodum
superstitioso, ex quo effectum est ut
minoris Asiæ haberetur metropolis,
& Ioniæ quoddā lumen. Mercatum
auxit maris opportunitas, quæ com-
modā exhibet stationē nauigatibus
in Syriam, Iudæā, Aegyptū ex Italia,
Macedonia, Græcia, aliisq; Europæ
locis, & inde in has regiones redeuti-
bus. Superstitionem verò confirma-
uit & admirabilem reddidit Dianæ
illud antiquissimum & sumptuosissi-
mum templum , de quo refert
Plinius libro trigesimo sexto, capite
decimo quarto quod annis ducen-
tis viginti à tota Asia sit conditum,
& loco quidem palustri, ne scilicet
terræmotu quateretur, & strato pri-
us carbonibus fundamento ne subsi-
deret. Pausanias tamen refert in
Achaicis libro septimo , templum

hoc à rege Crœso & Epheso erectū,
incolentibus tum ista loca Lelegi-
bus & Lydis, antequam eò commi-
grassent Amazones, quæ postea &
vrbem & templum occuparunt. Por-
rò Iones duce Androclo inde eie-
runt Lydos & Leleges cōtracto cum
Amazonibus foedere, inde facta est
ciuitas Ionica. Ad hos Ephesios, vt
constat ex Actis bis venit Apostolus
Paulus, primo aduentu humaniter
fuit exceptus, tamen non diu ibi per-
mansit, quod festinaret Hierosolymam,
vt est Actorum 18, interim ta-
men posuit fundamēta quædam &
initia religionis, mox capite 16. ad e-
osdem reuersus māsit biennio, quia
videbat ostium docēdi sibi magnum
hīc apertum esse, vt ipsem̄ testatur
in prima ad Corinhtios 16. cap. Capi-
te autē vigesimo Actorū, Apostolus
Paulus in oratione ad seniores Ephe-
sios

sios ait, se tribus integris annis illic vi-
xisse, exactius scilicet & diligentius
tempora computans. In hac Ecclesia
constituenda magna usus est felici-
tate. Nam homines illi non solum
erant moribus leues & superstitione
imbuti, sed magicis etiam artibus de-
diti, quibus malis euertendis Domi-
nus voluit demonstrare vim Euangeli-
i, quanto scilicet potentior esset
haec doctrina omnibus Satanæ incá-
tamentis. Nam Magicæ artes ita con-
futatur ab Apostolo, ut ipsimet com-
portatos libros suis magicos publi-
co spectaculo comburant. Quorum
librorum pretia Lucas dicit compu-
tata fuisse ad quinquaginta millia de-
nariorum. Cæterum in hac felicitate
Euangelii, Apostolus tamen non ca-
ruit suis periculis, ut est videre Act.
19. in prima ad Corinthios 16. vbi in-
ter alia testatur se cum bestiis pu-

gnasse Ephesi. Vide etiam Nicephorum lib. 2. cap. 25. Ad hos igitur Ephesios toto triennio adeò feliciter institutos, & in fide adhuc sincerè constantes præsentem scribi Epistolam.

O C C A S I O.

Occasio quæsita videtur esse. Non dum enim defecerat Ephesii, nec ullos errores in doctrina admiserant, quemadmodum Corinthiis & Galatis acciderat: tamen Apostolus vicus iam morti & senex, Ecclesiam hanc voluit ad cōstantiam in professione cohortari. Itaque amor veritatis illi occasionem præbuit. porrò reliquerat apud eos seniores quosdam & cum illis Timotheum quasi Episcopum, quos diligenter admonuerat officii sui in extremo digressu, Actorum vigesimo, ubi satis patet fecit quid in futurum metueret. Itaque

que iam absens curam hanc pro eis conseruandis non depositus. Nam mansit adhuc metus futuri periculi, quod mox post suum digressum emersuri essent lupi graues & falsi doctores ex ipsorum ipso coetu, qui fratres post se abduceret. Hunc metum non fuisse frustraneum antecedentia quædam exempla docent. Itaque Apostolus voluit extare illustre aliquod testimonium suæ doctrinæ etiam in hac Ecclesia, quod falsis doctoribus suo tempore posset opponi, & quò rectè sentientes haberent regulam in doctrina & moribus, quam tuto sequerentur.

GENVS.

Genus principale constituamus ~~προτεστατικόν~~, quia scopus Apostoli est ad constantiam hortari traditione ipsis doctrinæ, & quam adhuc

purè retinebant. Accessoria multa sunt. Laudat enim illorum fidem & constatiam quod est ἐπανεπικόν. Præterea copiosus est in explicandis diuinis beneficiis, quæ nobis nihil tale merentibus contulit, quod est ἐξηγηπόν, & pro his tot beneficiis sæpe Deo agit gratias, quod est εὐχαριστόν. Interduim petit à Deo ut dona sua in Ephesiis augeat, quod est εὐπάπον, & ipsis etiam detur præsentium bonorum vera agnitus & constantiæ robur. Accedunt διδακτικά, quibus ostendit vim salutis in uno Christo reside re, & esse gratiæ diuinæ merumque donum Dei, nō operum aliquod meritum, ne quis glorietur. Sic διδακτικά sunt quod capite 2. de se & suorum laborum fide differit. Sunt etiam quædam νοθεπικά quibus admonet eos, quales olim fuerint ante conuer sionem, quām indigni tot beneficiis,

&

& contrà quām felix nunc sit rerum status apud eos, vt scilicet bona præsentia in Christo haberent eò chariora.

ARGUMENTVM.

Argumēto Epistola nō videtur esse dissimilis ei quæ fuit ad Romanos & ad Galatas scripta: tamen alio genere tractatur, vt difficile sit partes cōmodè distinguere, nisi secundūm ipsam materiam. Tamen in hoc genere trāctat, Deum Patrem in Christo infinita nobis contulisse beneficia, quæ statim applicat tum ad Iudæos, tum ad Gentes, & contrà ostendit omnes homines natura sua fuisse inhabiles ad ea, & in genere ad totam causam salutis, in quo iterum Iudæos Gentibus æquat. Hinc tandem infert quod inde sequitur sponte, salutem & vitā æternam esse donum Dei, nec posse ullum de aliquo meri

G.J,

to gloriari. Hinc digreditur in prioris vitæ descriptionem , cui opponit præsentem vitam post cōuerisionem & beneficia Christi, quæ negari non poterant. Inde ad doctrinam suam se conuertit , ostendens ad illius conservationem pertinere totum suum ministerium, & præsentem etiam captiuitatem , adeoque mortem , quæ sit confirmatus hanc doctrinam , ex quo etiā sequitur principalis propositio , Ephesios exemplo Pauli oportere constantes esse in hac doctrina. Ultimò differit de operibus renati hominis, ne putarent fidem constare nuda quadam confessione, sed necessariò in ea requiri bona opera.

PROPOSITIO.

Duas in hac etiam Epistola constituimus propositiones, quæ tamen sibi subseruiunt. Prima personalis est quod scil. Ephesii in doctrina fibi tradi

tradita ab Apostolo & Christianæ dilectionis officiis vti hactenus fuerunt, ita deinceps quoque debeant esse constantes. Altera propositio ad rem ipsam pertinet. Nam explicat quæ sit doctrina Paulina, & eam copiose in hac epistola ornat, & magis explicat quam probet. Concipiamus igitur eam hoc pacto: Deus Pater in filio suo nobis maxima dona, quorum caput est vita æterna, gratis nihil que tale merentibus cōtulit, ideo vitæ sancti nonia & cōstantia professionem hanc fidei ornare debemus.

PARTES EPISTOLÆ.

Principalis propositio tres habet partes, quarum prior habet commemorationem diuinorum beneficiorum, quæ in Christo electis cōferuntur. Altera verò ostēdit quām simus omnes natura inhabiles ad ea beneficia perficienda. Tertia quæd opor-

teat hanc doctrinam constantia, & bonis moribüs ornare. Sed partes ordine sic connectamus. Initio titulus est cōstans inscriptione, subscriptione & salutatione. Secundo loco est Exordium, quod sumitur à rei magnitudine, ac facit ad attentionem, estque hoc loco statim constituenda propositio, ad quam reliqua referuntur, scilicet ver. 3. hac sententia, Deus omnibus piis laudādus est. Hinc ter tia pars constituantur, Confirmatio, eodem versu, & habet commemora tionem causarum, cur Deus sit laudandus. Causæ sumūtur à beneficiis, quæ piis cōferuntur in Christo, qualia hæc sunt: vocatio, electio, sanctificatio, prædestinatio, reconciliatio, redēptio, dona S. Sancti, qualia sunt sapientia & prudētia, patefactio diuinæ volūtatis, restitutio totius creaturæ in Christo, quæ omnia efficiūt Deū esse

esse laudandum. Hinc sequitur minor propositio, nos Iudæi & nos Gétes talia accepimus: ergo laudandus est à nobis omnibus. Additur minori propositioni *εκτασις* de usu donorum Spiritus Sancti. Ac ista quasi ad unum locum pertinent confirmationis à rerum magnitudine. Alter locus confirmationis est capite primo, ver. 15, ab authoritate Apostoli Pauli qui in hunc ipsum finem pro Ephesiis semper intercedit apud Deum, ut tanta beneficia ritè agnoscāt, adeo que auctiora ipsis reddātur. Tertius locus confirmationis sequitur capite secundo, quo ostendit ab ipsorum persona quam fuerint tantis beneficiis indigni, adeoque prorsus inhabiles ad salutem consequendam, & ut ipse loquitur, natura filij iræ. Nam hinc etiā efficitur Deum magis laudandum esse, quandoquidem indi-

gnis contulit. Et hactenus confirmatio propositionis in exordio positæ. Quarta pars deinde constituatur eodem cap. 2. ver 5. 8 & 9. quæ habet principalem propositionem causæ, quod gratis sine respectu operum in Christo iustificemur: fluit hæc rectè ex superiori argumentatione. Confer hæc cum propositione simili ad Romanos tertio, ver. 24. & 28. & ad Romanos ii. ver. 6. Ad Galatas 2. ver. 16. & ad Gal. 3. ver. 8. Huic propositioni additur sua confirmatio. Nam instituitur antithesis prioris vitæ ante conuersionē, & vitæ post conuersionem. Ex quarum rerum consideratione ostendit quo modo gratis iustificemur. Capite tertio ostendit ad huius doctrinæ conseruationem per tinere totum suum ministeriū, imprimit officiū docendi Gentes, sua pericula & ipsam mortē, quibus aditum sibi

sibi facit ad alteram principalem pro positionem de constantia, quæ tandem ponitur capite tertio, versu 13. Statuatur ergo hic quinta pars continens propositionem, quæ ad ipsam personā Ephesiorum spectat, quod hanc doctrinam constantia tueri debeant: huc facit superior tota argumentatio, in primis suum exēplum constantię. Capite 4. ingreditur doctrinam operum, quæ sexta sit pars de officiis renati hominis. Habet hoc mēbrum suam propositionem, confirmationē & similes locos. Propositio est, Vita & moribus ornanda est hæc doctrina, quod ideo dicit ne putent causæ huic satissieri inani quodam fidei simulachro, dum tantopere fidei nomen mundo cōmendatur. Hoc in genere tractat, mox ad speciem descendēs de vita ipsa emendanda: subiiciuntur hinc magis

G.iii.

specialia, vt locus contra mēdaciū,
de ira, furto , de oris castimonia , &
cōtra similia vitia. Capite 5. dilectio-
nem commēdat C hristi exemplo, &
iterum digreditur in prioris vitæ vi-
tia, & mox inde se recipit ad propo-
sitionem,cautè ambulandū esse,ver.
15. capit 5. ac iterum recenset vitia,
quæ emēdatione digna sunt, quibus
opponit virtutes, & honesta exerci-
tia Psalmorum & eiusmodi. Atque
ista omnia ad omnes pertinent, tan-
quam verè Ethica Christiana. Secun-
da parte persequitur officia priuato-
rum. Locus communis est de subie-
ctione, sed cadit in tres classes: in sub-
iectionē coniugalem, filialē, & serui-
lem. Ideo cap.5.ver.23.persequitur
officia vxoris & mariti, quibus asper-
git elegans exemplū Christi & Eccle-
siæ. Cap.6. alteram speciem subiecti-
onis persequitur, scil. filiorū erga pa-
rentes

rentes, vbi etiam docet quod sit officium parentum erga liberos. Et eodem cap. ver. 5. persequitur specie tertiam, de mutuo seruorum & dominorum officio.

Versu 10. constituatur ultima pars, quae habet epilogum generale, cuius partes praecipuae sunt. Primum repetitur principalis propositio, qua ad constantiam hortatur. Secundo, describitur Christiani hominis παροπλία, hoc est, armatura, in qua continentur instrumenta constantiae. Tertius locus est de precibus, tū priuatis, tum publicis. Faciunt autem preces etiam ad tuēdam constantiam. Quartus locus priuata continet, ut quod ille commendat Tychicum, ex quo omnia copiosius sint percepturi.

Quintus locus continet comprehensionem, & finalem clausulam totius Epistolæ.



DISPOSITIO EPISTO- læ ad Philippenses.

Qui fuerint Philippenses.

PHilippi vetus fuit Colonia Thasiorum in Macedonia, olim Datos appellata, & ante nomen hoc Crenida. Nam fontibus abundabat collis ille in quo condita fuit. Hanc urbem Philippus Macedo vallo munivit & auctiorem reddidit, & à se Philippos appellauit. Plinius lib. 4. cap. ii. Thraciæ cōnumerat. Hic campi sunt Philippici, nobilitati victoria Octauij Augusti contra Brutum & Cassium Iulij Cæsaris imperfectores. Appianus Alexandrinus libro 4. de bellis ciuilibus pulcherrimè eam describit his verbis, Philippi ciuitas est, quæ olim Datos dicebatur, Crenida autem

autem ante nomen Dati appellata,
quippe fontes plurimi circa collem
vberibus scaturiunt aquis, eū locum
Philippus vt accommodum meta-
tus super Thraces vallo sep̄sit, & à se
Philippos nuncupauit. Condita
autem est ciuitas in prærupto quo-
dam colle, & magnitudo eius collis
latitudinem complexa est, habetque
à Septentrione saltus & nemora, ad
quæ Rascopolis Bruti exercitum cō-
fidere monuit. A Meridie palus adia-
cet, & mare vltra illam. Ab Oriente
Sapiorum & Torpilorum visuntur
angusta. Ex Occidente cāpus est am-
plissimus, ad Marcinū usque & Tra-
biscum & Strimonem fluuium, per
stadia trecenta quinquaginta, grami-
ne vberrimus & amoenus, &c. Ad
hos Philippos peruenit Diuus Apo-
stolus, vt est Actorum 16. vñā cum Si-
la. Multis diebus ibidem docuit Spi-

ritu S. monitore, hospitio vsus Ly-
diæ purpurissæ, mox vterque ibi cæ-
sus in carcerem coniectus est propter
spiritum Pythonis à puella eiectum,
sed mox mirabili Dei consilio glo-
riosè iterum emittitur. Hos igitur ab-
sens, & à se rectè institutos cōfirmat
in suscepta doctrina, hortatūrque vt
omnibus modis persistant in fide, &
professionem hanc vitæ innocentia
ornent,

O C C A S I O.

Occasio certis de causis illi obla-
ta est. Nam habebant domestica dis-
fidia, vt est videre capite 1. ver. 28. &
capite 2. ver. 3. & 4. vbi hortatur ne
quid per contentionem & æmulati-
onem agant. Præterea imminebant
ipsis vt aliis ecclesiis grauia pericula
& persequutiones, in quibus igno-
minia crucis, & præsens Apostoli ca-
priuitas multos mouebat, quæ omnia
voluit

voluit hac epistola diluere, ipsosque confirmatos reddere contrahuiusmodi offendicula, & quævis pericula. Præterea sollicitabatur à falsis doctribus, ut circuncisionem & alia onera legis admitterent, ut est videre capite tertio. Ne igitur his eveniret quod Galatis acciderat, præmonet ne hos doctores admittant, immo tanquam canes & hostes crucis Christi diligenter caueant. Quæsita etiam videri potest. Nam in ipsum Apostolum multa cõtulerant beneficia, pro quibus voluit illis agere gratias, imprimis quod aluiisset ipsum suis sumptibus in ecclesia Thessalonicensi, ut est videre capite quarto.

PROPOSITIO.

Principalis propositio est, In hac ipsa doctrina Christianæ religionis, quam acceperunt à Paulo constanter Philippensibus perdurádum est, so-

lù n vitæ innocentia eádem strenue
ornent usque ad aduentum Domini
Christi. Hoc totum Apostolus ap-
pellat dignè ambulare Euangeliō,
cap. i. vers. 27.

GENVS.

Genus principale suaforium est.
Nam hortatur ad fidei constantiam,
cōcordiam, humilitatem, vitę inno-
centiam, & similes virtutes. Huic ac-
cedūt plura, vt est Eucharisticū, quo
Deo pro illorum fide gratias agit. Itē
ipſis Philippensibus pro subministra-
tis vitæ necessariis. Didacticum, quo
docet sua vincula non facere ad igno-
miniam doctrinæ, sed potius ad eius
confirmationem. Item capite tertio,
planè didacticus est, pro iustitia fidei
differens cōtra legis iustitiam. Epæ-
neticum cap. primo aspergitur, nam
laudat eos à constantia. Item capite
quarto, laudat ipsorum liberalitatem

&

capite secundo, habentur Timothei laudes, & ibidem Epaphroditi. Sunt quædā etiam *μεμπτηνα* inuectiua, siue reprehensoria, ut capite secundo, de falsis doctoribus, quòd sua solùm quærat, & nō quæ sunt Christi. Item capite tertio, appellat canes, malos operarios, concisionem pro circuncisione: item hostes crucis Christi, quibus taxat Iudæos quosdā qui legem Mosis, imprimis verò circūcisionem cum Euangeliō conabantur commiscere, quasi obseruatu res necessarias Christi sectatoribus.

PARTES EPISTOLÆ.

Partes sic connectimus. Initio titulus est, personarum ratione coniunctus, collocatione verò partium simplex. Constat enim nuda inscriptio ne, subscriptione, & salutatione. Altera pars exordium est versu 3. genere Eucharisticū, virtute ex ordiorum

spectat benevolentiam, quam diligenter captat à suo erga ipsos affectu. Et constat propositione, & propositionis ratione. Propositio est, Se nunquam nō pro ipsis Deo agere gratias. Aetiologya est à genere vocationis, à à suę personæ decoro, à cōmuni gratia & fortuna, & quia Deum habeat testem huius erga illos benevolentiae. Addit comprecationem, quibus ipsis optat auctiora bona & infert mētio- nem bonorum operum, quia ad illo rum studium mox est exhortaturus, & haec tenus exordium. Tertia pars constituatur ver. 12. quæ habet vim cōfutationis. Nam est Apologia pro vinculis suis: sentētia est, sua vincula non facere ad ignominiam doctrinæ sed potius ad confirmationem eiusdem. Rationes sunt, quia Christo gloria est captiuitas, deinde hominibus bono fuit exemplo. Nam mul-

tos

IN EPIST. PAVLIS

tos etiam ex hostibus excitauit ad
æmulationem docendi. Hoc ar-
gumentum illustri diuisione tra-
ctat, & præterea quia hoc ipsi sit salu-
tare, & ipsis Philippis vtile. Ha-
c tenus confutatio ignominiæ. Quar-
ta pars constituatur ver. 27. quæ con-
tinet generalem propositionē, quod
oporteat præsentem doctrinam bo-
norum operū studio exornare, quod
vocat ambulare Euangeliō Christi.
Hic scopus est totius Epistolæ, ideo
propositioni connectimus confirma-
tionē. Confirmationis præcipua argu-
mēta sunt, à sua spe & expectatione,
deinde quia hoc promouet causam
fidei: tertio à persona hostiū & con-
trariæ doctrinæ, quæ est pernicioſa
ipsis suis doctoribus: quartò à dono
Spiritus quod illi habebāt Apostoli
dono non inferius, atque sic conclu-
ditur hoc primum caput.

H.j.

Capite secundo ad specialia descendit, ut constet quibus operibus ornanda sit hæc doctrina. Hortatur igitur primum ad studium cōcordiæ quod suavi immoratione tractat, & contrariorum collatione. Secundò, hortatur ad humilitatem, & curam pro fratribus, cui addit suave exemplum Christi. Tertiò ad obseruantiam suæ, id est, Apostolicæ doctrinæ. Huic loco adduntur multa argumenta, ut quòd hactenus semper se tales præstiterint, & quòd Deum habeat in hoc cursu propitium, & quòd ex hac re magna sit speranda utilitas. Item quòd ipsi Apostolo sit futurum ornamētum. Præterea quòd ipse Apostolus quoque pro ipsis quiduis passurus sit. Atque hactenus Protreptica. Deinceps à ver. 19. capitilis secundi, intermissa argumentatione conuertit se ad συστατικὰ, id est, ad com-

men

mendationes. Ac primū promittit & cōmendat ipsis Timotheū. Secundū suū etiā promittit aduentū, Tertiō, commendat ipsis Epaphroditū.

Capite tertio præmonet de cauedis seductoribus, & grauiter disputat contra circuncisionem, suo proposito exemplo, quo tanquam absoluто ostendit veram iustitiam, quæ corā Deo valeat esse ex fide in Christum, non ex operibus seu circuncisionis, seu alterius legis.

Capite quarto repetit exhortationem ad constantiam, quæ planè pertinet ad generalem propositionem priùs positam, mox specialia ingreditur, & priuatas personas officii admonet, vt Euodiam, Syntichem, & similes. Versu 8. cōstituatur quinta pars, Epilogus totius epistolæ. Cuius loci sunt: primū repetitur exhortatio ad vitam, quæ ornet Christianam

professionem. Alter locus habet laudes Philippenium, & in Apostolo grati animi est argumentum: dederant illi vitæ necessaria præ reliquis ecclesiis liberalius, hoc studium hic commendat. Similia habuimus in 2. ad Cor. cap. 11. Tertius locus habet Doxologiam. Quartus, salutationes. Quintus & ultimus, comprehensionem: & sic absoluta est etiam præsens Epistola.



C O M P O S I T I O Epistolæ ad Colos- senses.

Qui fuerint Colossenses.



Oloßæ, Colosfarum ma-
gna ciuitas fuit & populo
la Phrygiæ Pacatianæ, sita
ad

ad Lycum & Meandrum fluminas,
postea mutato nomine appellata
Chone. Vicinas habuit urbes Apa-
meam, Laodiceam, & Hierapolim,
quatum in hac Epistola fit mentio,
terræmotibus aliquoties concussa
cum his vicinis urbibus, unde ni fal-
lor factum est ut Strabo lib. 12. oppi-
dum vocet. Nam Xenophon anti-
quior author, & inspectator huius
urbis non dubitauit vocare, Vrbem
bene habitatam, felicem & magnam.
Locus est libro primo expeditionis.
Plinius lib. 5. cap. 32. Laodiceæ etiam
facit vicinam, & lib. 31. cap. secundo,
refert ibi amnem quendam esse, in
quem coniecti lateres lapidescant.
Vide Strabonem lib. 10. & 12. Hero-
dotu lib. 7. & Plinium citatis locis.

In Actis 16. legimus Paulum pera-
grasse Phrygiam: & cap. 18. Galati-
cam regionem, & Phrygiam transiit con-

firmans fratres, tamē huius vrbis nulla fit mentio, nec etiam vicinarum, quas tamen non videbatur silentio præteriturus D. Lucas, si Apostolus has accessisset. Itaque sic statuendum est, in illis peregrinationibus Pauli, minoris Phrygiæ fieri mentionem, non maioris in qua erat Colossæ. In minori erat Metropolis Troia, vnde à Virgilio Phryges etiam appellantur: ex quo constat Apostolum Colossas non peruenisse.

OCCASIO.

Colossenses Apostolus nec videbat, nec instituerat, sed erant recte instituti ab Epaphra, Onesimo, Tychico, & similibus. Ab his igitur, & imprimis ab Epaphra fidi Colosserum ministro didicit Apostolus fortunam huius Ecclesiæ, quod scilicet ei immineret à Iudæis & prophanicis philosophis periculum, quemadmodum

IN EPIST. PAVLI.^{Colo. p. 119}

dum Philippensibus & aliis. Nam Iudei etiam Colossensibus Mosaicas ceremonias conabantur obtrudere. Philosophastri autem nescio quas subtiles disputationes de Deo, Angelis, similibusque argutiis proponebant, quibus omnibus simplicitas & puritas fidei Christianæ euertebatur. Quare Apostolus ut etiam apud eos his malis mederetur, hanc Epistolam ex vinculis Romæ scripsit.

ARGUMENTVM.

Approbavit Apostolus tota hac Epistola hanc solam doctrinam, quam acceperant ab Epaphro, & nunc adhuc sinceriter profitebatur ministro Archippo, ac præter hanc doctrinam non esse necessarias alias res ad salutem consequēdam, siue ex lege Mosaica, siue ex speculationibus Philosophicis, quod sola niterentur probabilitate sermonis. In hac igitur do-

étrina suadet illis esse perdurádum addita saltem vitæ innocentia.

PROPOSITIO.

Hinc facile colligi potest principalis sententia: Nimirum Colossenses in doctrina Epaphræ constantes manere debent, in eadémque in dies magis magisque crescere, exuendo veterem hominem, & induédo nūum, quo professionem fidei vita & moribus ornent in Iesu Christo.

GENVS.

Quemadmodū in aliis omnibus magnam habet similitudinem cū Epistola ad Philippenses, sic quoque in genere compositionis. Principale est Protrepticum, vult enim eos confirmare in recepta doctrina. Accedunt deinde varia, vt Eucharisticum quo Deo pro ipsis agit gratias. Didacticum, fide scil. in Christum nos fore iustos, modò accedat vitæ innocentia

IN EPIST. PAVLIC_{Colo. 121}
centia, nec alia re opus esse. Sic acce-
dit Ψευτικόν, quo damnat Pithanolo-
giam, probabilitatē philosophicam,
& simul Mosaicas ceremonias, im-
primis circūcisionem. Epæneticum
quo continentur laudes Colosse-
num, Epaphræ ut boni doctoris, Ty-
chici, Onesimi, & similium. Νερη-
νον quo singulos ordines sui officii
admonet, quò pertinet etiam quod,
ad finem Archippū, qui , ut apparet,
tum apud eos erat minister diligen-
tiæ & officii commonefacit.

P A R T E S E P I S - tola.

Constat partibus verè sex, quas
sic distinguimus, & connectimus.
Initio titulus est constans consuetis
partibus. Secūdo loco sequitur exor-
dium ver. 3. quod est compositum
ad benevolentiam. Congratulatur
autem ipsis ob receptā veritatis co-

gnitionem, ac cōstat prop̄sitione, & confirmatione, quemadmodum illud ad Philippenses. Rationes propositionis nituntur triplici argumento. Primum sinceritate fidei. Deinde furore dilectionis: & tertio autoritate doctoris Epaphræ,

Tertia pars constituatur versu 13. capit̄is primi, quę est propositio principalis, seu Thesis verę doctrinæ, quę scil. ad salutem consequendā sola sufficiat. In hac parte differit de beneficiis Christi, vt cōstet in huius sanguine solo nobis repositā esse salutem.

Quarta pars cōstituatur initio ca. 2. quę habet formā cōfutationis. Nam dānat reliquas doctrinas omnes, præter hanc vnicā, quam illi ab Epaphra didicerāt, adeoque docet intolerabiles esse reliquas omnes, siue ex Mōse siue ex Philosophia proferantur. Itaque ut meræ sutelæ cauendæ sunt.

Pars 5. constituantur initio tertii capitis, quæ habet cohortationem ad officia renati hominis, ac eleganter primitus in genere disputat, qui mores deceant omnes, mox ad speciem descendit, praescribens omnibus ordinibus sua specialia decora. Atque ea tractatio durat usque ad ver. 7, capitis 4. Itaque sexta pars statuatur eodem ver. quæ habet Epilogum de rebus priuatis. Continentur in hac parte laudes Tychici & Onesimi. Secundo loco sequuntur salutationes & res salutationes. Tertio loco speciale preceptum de hac epistola, quæ etiam legenda est in Ecclesia Laodicensi, unde satis apparet vicinas fuisse urbes.

Quarto loco sequitur speciale
præceptum. Quinto loco
mentione suorum vinculorum totam claudit
Epistolam.

Thessalia regio, quae non longe abest a Macedonia ante Myrmidoniam tibet rotatam fuit, nam cum bellis inter nos, non nisi thympha natione Thessalotinus, lucum magnum ciborum manu occupabit. 2. Vellere p. 3. c. 124.

ISA·GOGE

DISPOSITIO EPISTOLÆ ad Thessalonicenses.

Qui fuerint Thessalonicenses.

Theſſalonica olim Mace-
doniæ celeberrima fuit ci-
uitas, de qua vide Plinium
libro 4. cap. 10. Melam lib.
2. cap. 3. Strabo testatur suo adhuc se-
culo admodum fuisse florentem; cu-
ius hæc sunt verba libro 7. οὐδὲν μάλι-
στα τῶν ἀλλων εὐερδεῖ, hoc est, quæ
adhuc præ aliis vrbibus robore &
fortitudine ciuium floret. Populo-
sam fuisse satis indicat ipse situs &
maris commoditas. Nam habuit à
Meridie mare amplissimum, in cuius
recessu & amplissimo sinu condita
fuit. A Septentrione & Ortu Chabris
flavius illam muniuit, qui per regio-
nem

IN EPIST. PAVLI.^{the 125.}

nem Amphaxiten ad Ortum sese in
hunc sinum exonerat. Ab Occasu
est fluuius Echedorus, nec procul in-
de distat Berœa, ad radices montis
Citharij posita, quò sese Apostolus ^{Act. 17.10.}
recepit seditione suborta Thessalo-
nicæ, vnde mox Athenas profectus,
& ad eos rescripsit hanc ^{Termae} epistolam.
Olim dicta fuit Therma, vnde sinus
ille maris Thermaicus dictus est, vt
est apud Herodot. lib. 7. cuius verba
Latinè sic reddi possunt. Therma, est
quæ in Termaico sinu constructa vi
fitur, vnde sinus nomen etiam acquisi-
tiuit: Vbi Xerxes pedestrem exerci-
tum ab Achanto traductum nauti-
cas copias expectare iussit. Mutati no-
minis hæc videtur ratio. Philippus
Amyntæ filius in his locis memorabi-
li prælio Thessalos vicerat, in cuius
rei memoriam vicinam urbem Ther-
mam appellauit Thessalonicanam. Po-

stea Cassander hanc ipsam vrbē exor
nauit, & nomen recens ab euētu im-
positum in gratiam suæ vxoris Thes-
salonices, quę & ipsa filia regis Phi-
lippi erat, cōfirmauit: ita nomen ve-
tus Therma antiquatum est, & so-
lū m mansit sinui, vnde passim apud
autores Thermaicus adhuc dicitur
Hæc illa est Theffalonica, in qua
Theodosius Imperator in seditiones
quosdam grauiter animaduertit, ob
quod factum Imperator postea Me-
diolani ab Ambrosio fuit excommu-
nicatus nouo in Imperatores, exem-
plo. Circa hanc ipsam postea infe-
liciter pugnauit Constantius Impe-
rator contra Sarracenos, insomnijs
iudam sinistra interpretatione mo-
tus. Visus erat sibi Imperator per qui-
etem Theffalonicæ esse, mox exci-
tatus spem de victoria concepit, &
re cum ducibus communicata iussit

con

configere. Verum quidam ex du-
cibus solerter admonuit Imperato-
rem, insomnium non sibi porten-
dere victoriam, sed hostibus, ex in-
terpretatione nominis argumento
sumpto, θεος αλλω την νίκην. Quod cum
Imperator non admitteret, commis-
so prælio Sarracenis inuitus victori-
am cōcessit. Porro ad hos quomodo
venerit Apostolus & quanta diligen-
tia instituerit, vide Actorum 17.

OCCASIO.

Oblata est occasio, quemadmo-
dum colligi potest ex 2. & 3. capiti-
tibus huius Epistolæ: item Actorum
17. vbi refertur quod eos instituerit
feliciter in vera fide, disputando &
differendo per tria sabbata in illo-
rum cœtibus. Sed mox tumultu
per Iudæos concitato coactus est ce-
dere. Itaque contulit se in vici-
nam Berœam, hinc Athenas, & ex

Hodie Salomon actu-
jub misera serbitutis
terrea. Aliquantum
tempore passim agy
tradita fuit ab Am-
erom. Argto vi.
et Laoniam lib. 3.

via remisit ad eos Timotheum, qui eos & confirmaret in fide, & ad Apostolum omnem statum referret. Quo Athenas ad Apostolum reuerso, intellexit summā illorum constantiam, vnde motus hanc ad eos mox scripsit Epistolam, eo fine ut in hac ipsa constantia eos confirmaret, & quædam insuper vitia apud eos corrigeret.

GENVS.

Genus principale est Protrepticum, vult enim bene currentes confirmare in proposito, hoc ut obtineat alia multa admiscet: ut Epæneticum, quo vtitur cap. primo, laudans eos ab anteactis, & præcipuis Dei donis: & cap. secundo suas recenset non obscurè laudes, & boni doctoris virtutes, sic laudata virtus indubie apud eos creuit. Habet etiam Paræneticum, quo hortatur eos ad officiū renati

nati hominis, ut dignè Deo ambulent, ut ipse loquitur. Accedit etiam ἐπαγγελτικὸν, quo promittit suum aduentum. Didacticum, quo instruit quid in dubiis quæstionibus sit sequendum, ut in quæstione de luctu pro mortuis, de aduentu Domini, de eius momento & similibus, in quibus partim corrigit id quod erat vitiōsum, partim instruit quid sit tenendum.

PROPOSITIO.

Præcipuam sententiam Epistolæ comprehendimus hoc argumento. Thessalonicenses in ea doctrina, quę eos reddit certos de vita æterna, debent manere constantes. Sed Evangelium quod ab ipso Paulo didicērunt, hoc solum reddit eos certos de vita æterna: ergo in hac ipsa doctrina debent manere constantes.

I.j.

PARTES EPISTOLÆ.

1. Partes instituimus quinque. Prima est consuetus titulus.

2. Altera, est Exordium, cuius initium est ver. 2. ac constat propositio, & ratione. Propositio est, se indefinéter pro Thessalonicésibus Deo agere gratias. Ratio eius triplici consistit argumento, integritate fidei, dilectionis seruore, & crucis tolerantia, vnde constat Exordium facere ad benevolentiam.

3. Tertia pars statuatur ver. 4. & est Narratio. Habet enim præteritum rerum commemorationem, scilicet, qua fortuna acceperint Euangelium, quantis calamitatibus in recepto perdurent hactenus, & quanta diligētia hoc apud eos Apostolus propagavit. Porro narratio constat aliquot locis. Primus est de laudibus Thessalonicensium, ac constat propositione

positione & rationibus usque ad finem primi capit. 13.

Secundo capite ingreditur secundum locum narrationis de sua in descendendo diligentia, ac commemorat summò candore & constantia eum docuisse, quē locum tractat, primū remotione vitiorum, ut quod sine dolo docuerit, non ad gratiam, sine adulazione, non auarē, non ambitiofē, sine stipendio, hæc remouet. Deinde opponit his virtutes boni doctoris, quod summa humilitate, summa erga eos dilectione, gratis & vietando propriis laboribus in maximis periculis & summa vitae innocētia. Istis commōdē annexit propositionem totius suæ doctrinæ, ut dignē Deo ambulent. Reliqua deinceps ā versu 13. habet συναέρεσμα utriusque loci de ipsorum & suis laudibus, usque ad ver. 17, vbi sequitur tertius lo-

cus narrationis , de suo desiderio ad eos redeundi,& quibus causis hacten nus sit impeditus. Initio capitij statuatur quartus locus narrationis. Nam ostendit rationes missi ad eos Timothei,in quo argumēto perdu rat vsque ad versum 6. vbi statuatur quintus locus narrationis , explicans occasionem scriptæ epistolæ vsque ad versum 10. vbi statuatur sextus locus narrationis, repetens promissiō nem sui aduentus. Hactenus narratio. Initio ergo cap.4. quarta statuatur pars Epistolæ , continens exhortationem ad mores renati hominis, ideo corrigit initio quædā vitia,quæ apud eos adhuc regnabant, qualis erat scortatio,fraus in contractibus,otium iners , curiositas in quæstionibus non necessariis , immodicus luctus pro mortuis,curiositas in inquirendo horam aduentus Domini. Con trā

IN EPIST. PAVLICÆ¹³³

trà hortatur ad virtutes , dilectionē,
pacem, vigilantiam, & similes renati
hominis proprietates : durant hæc
vsque ad ver. 23. quinti capit. Ibi
statuatur quinta & vltima pars, Epi-
logus , qui constat comprecatione,
postulatione, salutationibus, præcep-
to speciali de hac epistola , & cōclu-
sione consueta.



DISPOSITIO POSTERIORIS Epistolæ ad Thessalonicenses.

Qui fuerint Thessalonicenses.

Thessalonica Therma dicta , & vt refert Stephanus Halia quoque , metropolis totius Macedoniæ , & in ora maritima loco admo-

dum opportuno condita fuit, quemadmodum retulimus suprà, & ipsæ quoque tabulæ Græciæ luculenter declarant. Itaque ad occasionē scriptæ epistolæ deueniamus.

O C C A S I O.

Occasio petenda est ex priori epistola, nominatim 2. 3. 4. & 5. capitibus. Nam capite secundo, versu 17. promiserat suum aduentum: & cap. tertio, ver. 10. causam eius subindicauerat, quod nimiriū vellet supplerre apud eos quædam quæ fidei ipsorum deessent, ex quo colligi potest Apostolum quædam tum nō scripsisse, quæ data opera in aduentum suum differebat. Capite vero 4. & 5. differuerat de Domini Christi aduentu, sēque his connumerauerat, quos Christus in hac vita esset deprehensurus, ex quo statim fluxit sinistra quædā apud imperitos opinio, Christum

stum nimirum venturū ad iudicium
istο seculo, quo adhuc viuebat Apo-
stolus. Parciùs quoque differuerat
contra otiosos, & curiosarum quæsti-
onum amatores, qualis erat illa de ad-
uentu Domini, qui vt tueretur otium
afferebant parum referre laborarent
nec ne, fine rerum iam imminente,
& ad hanc sententiam tuendam A-
postoli autoritate abutebātur. Qua-
re vt hanc absurdam sententiam re-
felleret, hanc secundam scripsit epi-
stolam. Præterea, ne viderentur à se
negligi, cùm videret perpetuò occa-
siones veniēdi sibi eripi, & vt senten-
tiam de aduentu Christi pleniùs ex-
plicaret, & otiosos diligentius cauen-
dos doceret.

GENVS.

Genus epistolæ principale est Pro-
trepticum, hortatur enim ad constan-
tiā sub cruce, & defensionem suæ

I.iiij.

doctrinæ,& traditionum Apostoli-
carum verarum , non quæ falso illis
obtrudebantur. Accedunt postea E-
pæneticum,vt quod initio laudat ip-
sorum virtutes , fidem, dilectionem,
constantiam, vt laudando tales effi-
ciat quales esse vult. Paramyticum,
quo locum de cruce totum ad conso-
lationem sanctorum accommodat ,
simul locū de iustitia diuina eodem
scopo attingit capite i. Didacticum,
quo locum de secūdo aduentu Do-
mini illustrat,monētque eos ne deci-
piantur ab otiosis erronibus,scrupu-
losē inquirentibus in momēta illius
aduentus. Paræneticum,vt in veris
Apostolicis traditionibus maneant,
quod Apostolo est generosè stare.Sic
πευκτικον accedit in Epilogo, quo eis
comprecatur gratiam & pacem Do-
mini.

PROPOSITIO.

Propositio totius epistolæ est, Constantia sanctorum non solùm ad crucis tolerantiam pertinet, sed etiam ad opinionū veritatem, & traditionum quæ verè sunt Apostolicæ conseruationem, cōtra quascunque corruptelas, quæ vel nomine reuelationū, vel spirituum, vel etiam autoritate Apostolica sanctis falso obtrudi possunt.

PARTES EPI-
STOLÆ.

Partes Epistolæ hoc pacto explicamus. Primum ponitur titulus consueto more. Secundo loco subiicitur Exordium, quod spectat ad laudem personæ, idéoque accommodatum est ad benevolentiam captandam, ac cōstat propositione & ratione, continuatur usque ad versum 5. Iстic ergo statuatur tertia pars, quæ continet

doctrinā de quæstionibus scitu ne-
cessariis, & quæ partim apud eos falsa
interpretatione erant corruptæ. Ac
cōmodè distingui potest in quatuor
principales quæstiones, quarum pri-
ma est de vñi crucis, cui nimirū Do-
minus suos affligat in hac terra. Ra-
tiones conquerit à personis, tum san-
ctorum, tum impiorum, tum ipsius
Dei, ideò cōcurrit locus de æquitate,
& iustitia iudiciorum diuinorum.

Capite secundo ingreditur secun-
dum locum doctrinæ, de aduentu Do-
mini, vt doceat illū certò certiorem
esse, quanuis momēta eius sint incer-
ta, hoc vt doceat ostendit quid ante
hunc aduentum oporteat priùs com-
pleri, nimirum reuelationem Anti-
christi, qui in templo Dei pro Deo
mundo se adorandum propositurus
sit. Producuntur hæc usque ad yer.
16. vbi sequitur Epilogus præcedētis
lo ci

loci, & cōmodē annexitur generalis proposi^{tio}, In veris Apostolicis traditionibus illis perdurandum esse.

Capite tertio ingreditur tertium locum, quod scilicet pro successu Euangeli, & eiusdem propagatoribus diligenter sit orādum. Versu 6. quartum ingreditur locum cōtra otiosos, quos grauiter coērcendos monet, & omnino vult hanc valere regulam, qui non laborat non manducet, ut hæc sit Apostoli sentētia, piis semper curandum esse ut honestis laboribus se alant, quasi in æternū yicturi, & contrā ad adiūtum Domini semper debent esse parati, quasi iam iam morituri. Durant hæc usque ad vers. 16. Quarta igitur pars istic statuatur, ac habet breuēm Epilogum, qui cōstat cōprecatione, salutatione, & repetita cōprecatione, quæ est quasi clausula finalis.



DISPOSITIO

prioris Epistolæ ad Ti- motheum.

Timotheus patria fuit, vt ferunt, Lycaonius, natus parētibus imparibus. Nā Aet. 16. matre Iudæa, pa-
tre verò Græco progenitus dicitur. Vnde in prima infantia quoque cir-
cuncisus non est. Infra in 2. Epistola
cap. 1. maternum genus diffusiùs de-
claratur. Nominat enim Apostolus
illuc matrem Eunicam, auiam verò
Loidem, matronas admodum pias &
Christianas à quibus in sacris literis
& Christiana religione à puero edu-
catus fuit. Nam infra in 2. Epistola,
capite 3. à puero nouisse sacras literas
scibitur, & capite primo eiusdem, fi-
dem auiae & matris in ipso quoque
habitare

habitare. Itaque incircūcīsus quan-
uis fuerit: mature tamen Christum
agnouit, quæ professio illum adultū
nunc poterat liberare à circūcisione,
nisi certo Spiritus Sancti consilio, ad
certam ecclesiæ utilitatē Apostolus
circumcidisset, id quod D. Lucas ex-
primit in Actis 16. Præceptorē habuit
præter matrem & auiam Apostolū ^{Præce-}
Paulum, vnde in hac Epistola, & aliis ^{piores.}
locis filius appellatur. Et quia fidum
in professione Christiana deprehen-
dit, fermè peregrinationum suarum
comitem habuit, aut saltem ipso præ-
pedito, ut legato ad diuersas Ecclesiias
est vsus, adeò ut & ipse Apostoli mu-
nere videatur functus. Comes fuit
in Actis 16. & 20. Legatione verò fun-
gitur à Paulo missus, Act. 19. ubi cum
Erasto in Macedoniam mittitur. Ad
Corinthios quoque missus est, ut
constat ex prima Epistola cap. 4. Et

ad Philippenses quoque missus est, ut
res ipsorum inspiceret, ut est cap. 2. Et
ad Thessalonices, ut in fide eos con-
firmaret, ut est in 1. ad Thessaloniken-
ses, cap. 3. Et hic Ephesi relictus, tan-
quam Episcopus, ut doctoribus legis se-
se opponeret, de quo vide Euseb. li.
3. cap. 4. & Nicep. lib. 15. cap. 14. Hinc
factum est ut Apost. Paulus in certis
quibusdam scribendis epistolis ipsum si-
bi confundat, ut est videre in utraque
ad Thessalonenses, ad Philippenses,
ad Colossenses, & in 2. ad Cor. Per
cepera magna illius laus est quoties e-
ius incidit mentio, ut in 1. ad Thessala-
lonenses, cap. 3, fratrem suum & Di-
aconum Dei vocat. Item ὁ ἀρρεφός in
Euangelio. Ad Philippenses capite 2.
τοῦ ψυχοῦ. In prima ad Corinth. capi-
te 4. filium dilectum & fidelē in Do-
mino. Ad Romanos 16. capite quo-
que agnoscit ὁ ἀρρεφός. In 1. ad Corin-
thios

thios 16. capite, Opus Dei operatur
ut ego. Ex quibus vtcunque colligi
potest de vita tota. De morte eius ni-
hil certò colligi potest, quanuis sint
qui martyrio coronatū dicant. Hiero-
nymus Tomo tertio aduersus Vigil-
antiū, refert ossa illius cum reliquiis
Andræ & Lucæ Cōstantinopolim
esse translata ab Imperatore Cōstan-
tino, quod etiam habet Nicephorus
lib. 10. cap. II.

OCCASIO:

Occasio colligi debet ex primo ca-
pitate huius Epistolæ, & ex 20. Acto.
Nam Apostolus Paulus prefecturus
in Macedoniam eum reliquit Ephesi
ut scilicet ibi subsistēs resisteret No-
modidascalis, id est, legis doctoribus;
aliisque corruptoribus sanæ doctri-
næ. Nam Satanas passim synceritati-
fidei infidiabatur per ceremonias
Mosaicas, & Philosophica deliria. Sic

Galatæ semi Iudæi facti erant, & Corinthii more Ethnico impunè ferebant quævis vitia. Similes corruptelas metuebat Apostolus in Ephesina Ecclesia, ideò ut his poneret obicem, hunc apud eos reliquerat sanæ doctrinæ impigrum defensorem. Deinde in illa Ecclesia nondum erat constitutus numerus ministrorum in dendo Euangelio necessarius, quos quidem nemo rectius constituere poterat, quamvis qui eligendi autoritatem diuinitus accepisset, quales tum erat Apostoli, & inter eos Paulus, qui dum in Macedoniâ auocaretur, hanc curâ huic demâdauit, atque ob id in electione quid debeat spectare imprimis monet, ne cuiuis manus citò imponat, & in imponendo diligenter monstrat qui admittendi, aut repudiani sint. Ex quo etiâ hoc consequitur, spectasse Apostolum ut haberet tota posteri

posteritas ideam gubernationis ecclesiasticæ, & totius ministerij, quā deinceps tanquam regulam omnes sequentur.

PROPOSITIO.

Argumentum in hanc sententiam contrahimus. Timotheo summa cura annitendum est ut ecclesia Ephesina quam rectissimè omnia administret, tum in tueda sana doctrina contra quasvis corruptelas, tum in ordinandis ministris ecclesiarum, tum in exequendo officio, docendo, admonendo opportunè, omniū ordinum & ætatum homines. Hinc statuatur Thesis, seu generalis propositio. Omnes qui ecclesiis præesse vtiliter volunt ad exemplum Timothei, & ad præscriptum D. Pauli, ista quam diligentissimè curare debent.

GENVS.

Genus principale est Nominis.

K.J.

Nam admonet de rebus scitu necessariis, de quibus ore tenus indubie cum illo egerat, ideo absens eadem breuiter in memoriam reuocat, ut de conseruanda sana doctrina, de retinenda εὐταξίᾳ, de officiis omniū ordinum. Huic accedūt Protrepticum: saepe enim ad exhortationes digreditur. Didacticum, quo docet, & suum patefacit consilium, monstratque sequenda. Epæneticū, quo personam Timothei laudat. Ψευτικὸν, quo inuenitur in corruptores sanæ doctrinæ. ἐπαγγελτικὸν, quo prædictit euentura, & quodammodo Prophetę officio fungitur, ut capite quarto.

P A R T E S E P I- pistolæ

Partes tres constituimus. Ac prima tribuatur titulo. Secunda instrutioni. Nam statim exorditur ver. 3. à re ipsa, ostendens finem sui consilij, cur

cur nimirum sit relictus Ephesi. scil.
vt sanam doctrinam diligenter tuere
tur, ideo locus est prolixus de synce-
ra doctrina defendenda. Et quia cor-
ruptores illius erant Iudæi, ideo addit
opportunè locum de vero usu legis,
quam illi sinistrè commiscebāt Euani-
gio. Hic locus tractatur à versu 8,
usque ad II. à quo & deinceps tractat
locum de sua vocatione, usque ad 18,
vbi redit ad commendationem suæ
doctrinæ.

Capite secundo, secundus instru-
ctionis sequitur locus, de publicis
precibus instituendis, cui addit locū
de conseruando de coro in cœtibus,
nominatim ab ipsis mulieribus, quæ
videbantur Ethnicorū more parum
verecundē conuenire, adeò ut præ-
fumerent etiam docere. Hoc ergo di-
ligenter cauendum admonet.

Capite tertio, tertius est instruc-
ti-

onis locus , quid in eligēdis ministris sequendum sit. Ac primūm describit ideam boni ministri , vt constet qui admittēdi, aut subimouendi sint. Deinde de Diaconis agit. Tertiō, de ministrorum & diaconorum vxoribus & familia. Quartō, de alio genere diaconorū, quod præerat eleemosynis. Quintō, subnectitur omnium generalis conclusio.

Capite quarto, quartus est instrutionis locus, de seductoribus cauendis omnium ætatum. Quos primitus describit à doctrina & professione, item genere vitæ. Secundō, agit de disciplina. Tertiō, de ætate iuuenili, quę in ministro certis quibusdam dotibus excusari potest.

Capite quinto, quintus est instrutionis locus , qualis scilicet esse debet erga quosuis homines in admonendo, Ac primūm in sexu virili differentem

ferentem ætatem notat. Deinde prolixius agit de viduis, quas distinguit ab ætate, in eas quæ prouectiores sunt & in eas quæ adhuc iuuenculæ, ut in singulis decorum melius obseruari possit. Tertio, de presbyteris. Quartò de manuum impositione. Quintò, quædam priuata ad personam Timo thei spectantia. Sextò, generalis sequitur Epilogus, cōtinens distinctionem peccatorum, & similiter bonorum operum.

Capite 6. persequitur quintum locum, & differit de seruis quomodo hi admonédi sint sui officij. Secundò agit de schismaticis, quomodo deprehendi possint & sint admonendi. Tertio, agit de Christiana rerum sufficientia, quam *aūrāpneāay* nominare possumus. Quartò, contra auaritiam. Quintò, iterum ad personalia descendit & priuatim cum Timo-

theo agit. Sextò , redit ad locum de auaritia, & ostendit quomodo di uites admonendi sint sui officii. Atq; ha&tenus à versu 3. capitis 1. est perpetua instru&tio, vsque ad versū 20. cap,
 6. Vbi constituatur Epilogus totius Epistolæ, adeoque tertia pars. Ac primitus repetitur admonitio, de tuēda sana doctrina, & cōtrāiis corruptelis omnibus vitandis. Deinde breui clausula & sibi consueta totam Epistolam concludit.





COMPOSITIO POSTE- rioris Epistolæ ad Ti- motheum.

OCCASIO.



Ccasio secundæ Epistolæ cōmodè sumi potest ex ipso exordio , ex quo constat quod Timotheus Apostolum Paulum in yltimo dīgressu dimiserit multis lachrymis. Hunc dolorem in discipulo vt leniret, promisit illi in priori epistola cap. 3. versu 14. suum rēditum. Interea vt res humanæ incertæ sunt, Apostolus in vincula coniectus est , & captiuus Romam pertractus. Et res ita procedunt , vt tantum absit se redire posse Ephesum , vt potius præsentissima mors illi in dies sit expectanda, sicuti

K. iij.

patet infra 4. cap. Itaque & fidem liberare voluit apud Timotheum , & dolorem lenire, & ipsum contra ad se Romam euocare certo cōfilio, vt scil. ipsum contra molē persequutionum confirmaret, & de tota causa religionis vberiūs cum illo conferret. Et in casum si fortasse planè non veniret, aut seriūs, iam ipso mortuo haberet tamen præceptoris sentētiam, quam in omnibus sequeretur. His de causis motus, indubie hanc secundam scripsit.

GENVS.

Genus vt in aliis mixtum est, principale tamen est ἀροτρεπτικὸν, scil. vt in susceppta professione contra omnē crucis molem perduret cōstanter. Accedunt postea alia. Διδακτικὸν, quo docet vocationem ad fidēm sola niti gratia Dei: itē quid in aliis sequendū illi sit. Επανεπικόν, quo laudat Timotheū

à virz.

à virtutibus minime fictis. Ψευτικόν,
quo inuehitur in apertos Christi
hostes, qualis erat ille Alexander fa-
ber ærarius, & alij nōnulli, quorum
nomina supprimit. Επαγγελτικόν, quo
iterum prophetæ munere fungitur,
& oracula reddit de statu nouissimo
rum temporū, vt capite tertio patet.

PROPOSITIO.

Propositio sumatur ex versu 6.
capitis primi. Timotheo curandum
est, vt dono sibi cœlitus collato for-
titer & constanter vtatur. Donum
vocat, quicquid pertinet ad offici-
um ministerij ritè obeundum, quæ
omnia eadunt in hæc duo membra.
In constantiam sub cruce, quæ uti-
que donum Dei est, & in curam
sanæ doctrinæ defendendæ & pro-
pagadæ. Idcirco in consequētibus A-
postolus ad hæc duo membra confir-
mationem accommodabit.

PARTES EPISTOLÆ

Partes epistolæ manifestius possunt deprehēdi in hac quām in aliis non-nullis. Constituamus ergo septem illius membra. Prima pars habet consuetum titulum. Secunda à versu 3. habet exordium, quod prorsus ad benevolentiam spectat. Nam rerū anteactarum cōmemoratio mirificam habet amoris significationem. Tertia pars constituatur versu 6. ac continet propositionē generalem. Debes donum Dei auctius in dies in te magis magisque reddere. Quarta pars versu 7. tribuatur confirmationi. Quæ primitus accommodatur ad toleratiām præstandam sub cruce. Ac continua-tur usque ad finem i. capit. Initio ergo secundi capit. applicatur confirmatio ad alteram partem de sana doctrina & defendenda & propagāda. Durātque hæc pars confirmationis usque

vsque ad versum 14. eiusdem capit. Iстic ergo statuatur quinta pars, quæ habet digressionē in ea vitia, quę sanā doctrinā vt plurimum euertunt. Ac comodè distinguuntur in duos ordines. Alia enim in ipsis doctoribus vt plurimum residēt, qualia sunt λογομαχία, κενοφωνία, νεωτερικὴ ὑπερηφανία, & μωραὶ τοις ἀπαίδευτοι ζητήσεις.

Atque de his agit vsque ad finem illius capit. Tertio ergo capite ab initio alterum genus vitiorum persequitur, quod & ipsum euertit sanam doctrinam, sed magis commune est doctoribus cum auditoribus, qualia multa refert ab initio tertij capit. Tractantur hæc vsque ad ver. 10. Sexta ergo pars statuatur ver. 10. & est Epanodus ad coeptam exhortationem, id ē repetit, seruato etiā ordine, principales duos locos, scilicet constantiam sub cruce, & mox ver. 14. alte-

rum de sana doctrina & defendenda
& propaganda. Vterque principio
quarti capititis cōmoda illatione con-
cluditur suaui adhibita tractatione.
Nam initio adhibita est grauis obte-
statio. Deinde ver 2. ipsa propositio.
Tertio ver. additur *αἰτιολογία*. Quin-
to illatio. Sexto, & aliquot cōsequen-
tibus versibus noua argumentatio à
suo exemplo. Versu 9. statuatur septi-
ma & vltima pars, Epilogus, cōtinens
res priuatas, ac primum aduentū eius
esse accelerādum, quando prēter mot
tē nihil amplius sperare potest. Dein
de admonet quibus rebus instructus
venire debeat, Marco comite, assu-
pta etiam penula, libris, & aliis non-
nullis. Tertiò, querelas instituit,
de duplice hostium genere. Primi
sunt aperti, pro quibus etiam non
orat, sed potius cauendos dicit. Po-
sterius genus ex fidelibus debilibus
est

est, ideò pro his etiam orat. Quarto loco sequuntur salutationes, quibus interposita est επεμβολή de Eusto, Trophimo, aliisque, & iterum monet de suo aduentu. Quinto loco gemina comprecatione epistolam totam concludit.



DISPOSITIO EPI- stolæ ad Titum.

Quis fuerit Titus.

Titus genere fuit Græcus adeóq; paréibus Ethnicis natus. Nam in epistola ad Galat. 2. proditū est illum incircūsum fuisse & māfisse, quod sanè ortū sapit Ethnicum. Et mirum est cur manserit incircuncisus, cum tam Timotheum circūciderit idem Paulus. Sed Apostolus reddit rationē

ut libertatem Christianam defendaret hoc exemplo contra Iudæos , qui circuncisionem necessariam homini Christiano putabant. Præceptorem habuit Apostolum Paulum, cuius etiam fuit in multis peregrinationibus comes, aliás ab eodē missus est ad diuersas ecclesias, tāquam legatus Christi. Sic ad Corinthios missus est ad colligendas eleemosynas pro pauperibus qui erant in Iudæa , ut est in 2. ad Cor. cap. 8. ver. 6. & 16. Ex quibus constat eum Apostolo fuisse charissimum, quòd facit etiam quod passim illeius facit honorificam mentionem, ut in 2. ad Corinthios cap. 2. ver. 12. fratrem vocat, & 8. capite ver. 23. eius dē Epistolæ κοινωνία & συνεργίᾳ . In præsenti epistola filium. In 2. ad Corint. cap. 7. ver. 6. dicit se singularem consolationem accepisse ex reditu Titi. In 2. ad Timo. cap. 4. ver. 10. scribit illum

lum abiuisse in Dalmatiam, quod intelligo missum docendi causa ab Apostolo. Et in hac epistola scribitur quod in Creta sit relictus, nō solūm ad docendum, sed etiam ad cōstituen dum alios ministros. Fuit autem amplissima tum insula, vt quæ centum habitata sit vrbibus, in quibus indubiè passim docendum fuit. Hieronymus author est, nō solūm in hac, sed & in vicinis quoque eum docuisse, in Creta verò mortuum & sepultum esse.

OCCASIO.

Occasio scriptæ epistolæ sumatur ex ipso exordio. Nam significat ibi in Creta illum hoc consilio relictum, vt oppidatim constitueret ministros, & docēdo populi corrigeret mores, Erat autē iuuenis adhuc Titus, ideo Apostolus absens, ne quid temere ageret, hac epistola instruit, nomina-

tim quales admittendi essent ad ministerium, & quales remouendi. Item qua prudentia & lenitate mores auditorum corrigere debeat. Deinde nota erat Apostolo Paulo Cretesiam vanitas, & in moribus corruptela. Ideò statim primo cap. ex veteri poëta illos describit, cùm appellat mēndaces, malas bestias, pigros ventres. Ob id ne quid remissius apud eos ageret Titus, admonendus erat. Prēterea oberrabant in ea insula Iudæi acerri- mi legis patroni, quibus ne Titus cederet in defendenda sanæ doctrina, diligenter fuit admonendus.

ARGUMENTVM.

Instruit ergo discipulū quales sint admittendi ad ministerium verbi, tales nimirum solum, quos morum integritas, & studiū sanæ doctrinæ defendendæ & propagandæ commendaret. Ideo eius rei virtutes commemorat,

morat, quales supra in epistola ad Timotheum capite tertio. Deinde in ipso Tito requirit summa in prudētiam in corrigendis peccatoribus, habita ætatis, sexus, conditionis ratione, ut hoc modo ad vitæ emendationem hortetur. Omnino enim necessarium est, ut p̄ij professionem suam innocentia vitæ ornent, ideo auditores etiam in genere omnes monet, ut memores prioris conditionis agnoscant gratiam Dei, & ideo promptius emendent vitia, in quibus haec tenus vixerunt. Nec solū illa quæ sunt in moribus externis, sed etiam quæ sunt ingenij, ut est ardor disputandi de variis quæstionibus, studium genealogiarū, & in similibus rebus curiositas, quæ omnia prohibet Apostolus, tanquā certissimā pestē sanguinis doctrinæ. Ad ultimum monet etiam de hæreti c̄is corripiēdis, & si ita perdurent vi-

L.j.

tandis. Demum rebus priuatis epistola
lam concludit.

GEN VS.

Génus principale est Νέστηνον. Ad
monet enim quid præcipue in eligé-
dis ministris, & corripiendis auditó-
rum moribus sequi debeat. Acce-
dunt διδακτικόν, quo docet qui sint i-
donei, item qua prudētia singuli sint
admonēdi, & quòd salus nostra con-
sistat nuda gratia Dei. παραπομπή,
quo hortatur ad mores, ut responde-
ant professioni. Ψευτικόν, quo inuehi-
tur in vitia Gretenium, & malorum
doctorum. Επανεπικόν, quo Titum
ut bonum ministrum commendat
& laudat.

PROPOSITIO.

Sententia propositionis est. Tito
est curandū, ut in eligédis idoneis ver-
bi ministris, & corrigédis auditorum
moribus ad præscriptū Apostoli o-

mnia quām prudētissimē exequatur.
Hinc deducatur generalis propositio
seu thesis, quæ valeat in omni mini-
stro. PARTES EPISTOLÆ.

Partes in breui hac epistola con-
stituimus quatuor. Et prima quidem
titulus est, consuetis partibus compo-
situs. Secunda, est exordium petitum
ab ipsa propositione, ver. 5. Habet au-
tem partes duas propositio: priore est
Ἐπιδιόρθωσις, hoc est, facultas corri-
gendi hominum prauos mores, per
doctrinam Euangeliū, quod quomo-
do fieri debeat, suo loco dicet. Altera
pars est *κατάσασις*, h.e. facultas eligen-
di & constituēdi ministros idoneos a
liis ecclesiis, qui sanā doctrinā & tue-
ri & propagare vtiliter possint. De
his duabus partibus agitur tota hac
epistola. Tertia pars constituatur ver.
6. & est ecphrasis, hoc est, explicatio
propositionis positæ, adeóque perpe
L.ij.

petua instructio, quid in utroque membro sequendum sit. Porro quia duo proposuerat sibi explicanda ordinem commode mutat. Ac primo loco agit de constituendis ministris, quorum virtutes toto cap. persequitur. Initio capit is 2. ingreditur alteram partē propositionis, quam appellauimus *πιστόρθωσιν*, & docet qua prudentia à ministro idoneo corrigi possint mores in auditoribus, habita scil. ratione ætatis, sexus, conditionis, & similiū. Orditur igitur à senibus. Deinde agit de matronis. Tertio loco de maritatis. Quarto de iuuenibus: & quia hāc rem imprimis iuuat doctoris exemplum, ideo quinto loco ostendit quomodo ipse Titus vivere debeat. Sexto loco agit de seruis Septimo digreditur in generalē θέσιν. Et octauo commoda conclusione locum hunc semel concludit. Initio ter-

tij capit is persequitur rē propositam,
& in genere ostēdit quomodo sub-
ditis viuēdum sit erga magistratum.
Scopus omniū est vt professio Chri-
stiana ipsis moribus ornetur. Ideo
admonet de priori conditione, & sa-
lutis rationē solius esse gratię. Quar-
ta pars statuatur 12. ver. tertij capit is
& est breuis Epilogus. Eius mébra,
sunt. Primum euocat Titū ad se Nico-
polim. Inde commédat ei Zenam &
Apollum. Tertio, addútur salutatio-
nes mutuæ. Quartò, consue-
ta clausula & com-
precatione clau-
dit episto-
lam.



DSIPOSITIO EPI-
stolæ ad Philemoneim.

Quis fuerit Philemon.

PHilemon noster Colos-
sēsis fuit, ut placet D. Hiero-
nymo. Theophylactus
Phrygium facit, nō dissen-
tiens à Hieronymi sententia. Nam
suprà ostendimus Colossas Phrygiæ
Pacatianæ fuisse Metropolim. Porro
ex præsentि epistola colligi potest ho-
minem fuisse diuitem, & inter suos
cōciues magni nominis, cum domus
eius priuata ecclesia fuerit celebris, in
qua indubie multi fuerunt peregrini
in quos liberalis & hospitalis fuit, ut
cōstat ex 7. ver. vbi declaratur quod
consolatus sit pauperes, & viscera san-
ctorum refocillarit. Ad hunc igitur
præsentem scripsit epistolā, tāquam
hominem

hominem notum, & iure hospitij familiarem.

OCCASIO.

Oblata est occasio. Nam seruus Onesimus compilatis quibusdā rebus, & cum his indubie pecunia domini sui, profugerat, Romamque se contulerat. Quò cum peruenisset audiuit Paulum docentem Euágelium, cuius doctrina mox in seruo fugitiuo fuit efficax, adeò vt conuersus ad fidē Apostolo seruiret in vinculis, qui dum intellexisset causam fugæ, iussit vt ad herum rediret, & vt facilius ei reconciliaretur, hanc tradidit epistolam.

GENVS.

Domino suadet vt in seruum fugitium præstet officium pietatis, pro seruo gratiam petens. Ideo petitionarium & suatorium est, quorum ytrumque ad deliberarium pertinet, cuius finis est persuadere, officiū vero, eorum nihil intermittere, quę ad

persuadendū videntur facere. Huic accedit Epæneticum, quo Philemonem laudat.

PROPOSITIO.

Propositio est. Philemon condonato delicto Onesimum in gratiam debet recipere. ver. 10.

PARTES.

Brevis quidem est epistola: attamen partes ferè omnes attingit. Nam primum titulus iustæ magnitudinis ex suis integris constitutus est partibus. Secundo loco est exordium ver. 4. quod planè ad benevolētiam spectat. Nam laudat personā Philemonis, & pro virtutibus eius Deo agit gratias. Continuatur usque ad ver. 10. Tertio loco est Protafis, ver. 10. Debes Onesimum tanquam filium meum recipere in gratiam. Quarto loco sequitur ver. 11. formā confirmationis, suadens reconciliationem à spe futuræ utilitatē.

utilitatis. Quinto loco est confutatio
ver. 15. Nam istic diluit duo primaria
crimina, quæ reconciliacioni poterant
obstare, furti scil. & fugæ, quorum v-
trunque ita diluit, ut apud hominem
Christianum & pium facile sit habi-
tura locum reconciliatio. Durat hoc
membrum usque ad ver. 21. Iстic er-
go statuatur sexta pars Epilogus, quo
primitus breuiter repetit propositio-
nem, & se excusat, cur in tali causa illi
sit molestus scribendo. Deinde ad-
monet illum de preparando sibi hos-
pitio, significans recepto Onesimo,
recipi quoque Apostolū, quasi non
sit venturus, nisi hoc prius recō-
ciliato. Tertiò, addūtur salu-
tationes. Quartò, compre-
catione clauditur
epistola.



DISPOSITIO EPI-
stolæ ad Hebræos.

*Quis fuerit autor epistola
ad Hebraos.*

PE Epistola ad Hebræos triplex est hominum doctořū iudicium: nōnulli neque Canonicā, neque Paulinam agnoscūt: alij Canonicam quidē, sed Pauli esse negant: tertij verò & Canonicam & Paulinam affirmant. Primi illi istis ferme ducti sunt rationibus, autoritate scil. Latinæ Ecclesiæ, quæ serò & vix tandem hanc admisit in canonem sacrarum literarum. Inde quod cap. 6. videatur Nouati dogma defendere lapsis negando veniam. Et denique quod Hieronymus, Augustinus, & alij saepe dubitanter citent ex hac epistola testi-

testimonia. Sed his rationibus ab aliis iam s̄æpe satisfactum est. Secundæ opinionis ista ferme sunt argumenta. Primum quòd in tota epistola nō extet nomen Pauli, nominatim in titulo. Deinde genus scribendi, & styli proprietas multum videtur discrepare à Paulinis epistolis. Tertiò, quod capite 2. autor de se loquens videtur quasi de discipulo Apostolorum loqui. Et quarto afferunt ex Nicephoro lib. 4. cap. 34. de Caio veteri quodam scriptore, qui hāc Pauli esse negat. Cæterūm isti has rationes non vehementer vrgent, & cum tertiiis facile consentiunt, & canonicam esse, & ardore cum Paulinis congruere. Itaque breuiter perstringamus rationes eorum, qui & Paulinam, & Canonicam agnoscunt. Qui his ferme vtuntur argumentis. Primum, quod materia cōsentiat cum articulis fidei,

ad eóque cū doctrina Christi & Pauli. Deinde quòd Græci cōmuni consensu mature receperint, quod iudicium etiam confirmauit synodus Nicæna. Tertiò Nicephorus lib. 4. cap. 33. de Clemente Alexádrino scribens dicit hanc Paulo tribuisse, quibus addit Euseb. lib. 5. cap. II. à Paulo scriptā esse Hebraicē, per Lucam verò trällatam in Græcum sermonem, & quidem liberiori stylo. Quartò, Origenes in enarratione Psal. primi connumerat manifestè hanc Paulinis epistolis. Idem facit Niceph. lib. 5. cap. 16. & Euseb. lib. 6. cap. 18. Quintò Clemens ille Romanus, qui fuit à Petro quartus, hanc etiam Paulo tribuit, referente Hieronymo, quod etiā habet Nicephorus lib. 3. cap. 18. & Euseb. lib. 3. cap. 38. Sextò idem Nicephorus lib. 2. capite 46. contendit referendam esse inter Paulinas, quanuis sit versa, seu à Luca

Luca, seu à Cleméte Romano, quod posterius illi videtur vero similius. Septimò, Eusebius libro tertio cap. 26 non reponit inter suspectos libros noui Testamenti, sed cap. 3. eiusdem lib. 3. manifestò etiam hanc Paulo tribuit. Octauò, Irenæus vetustus scriptor, huius epistolæ testimoniis vtitur tanquam Paulinæ. Nonò, Cyrillus etiam lib. 12. cap. 9. sui thesauri, plurima testimonia hinc desumpfit, tanquam ex epistola Pauli. Decimò, Chrysostomus quoque integris commentariis eam illustravit tanquam Paulinam. Undecimò, Dionysius ille Pauli discipulus hanc præceptoris suo Paulo tribuit. Duodecimò, Augustinus in expositione epistolæ ad Romanos hanc ut Paulinā citat, redditā etiā causa cur nomen pauli omissum sit in inscriptione. Decimotertio, D. Hieronymus vtut alibi dubitanter

de hac loquatur:tamen in epistola ad Dardanum manifestè hanc Paulo tribuit,vt inde facile colligi possit quid de hac senserit. Verba illius ista sunt: Illud,inquit,nostris dicendū est,hanc epistolam , quæ inscribitur ad Hebræos non solùm ab ecclesiis Orientis, sed etiam ab omnibus retro ecclesiasticis Græci sermonis scriptoribus, quasi Pauli Apostoli suscipi,licet plerique eam Barnabæ,vel Clemétis arbitrentur,& nihil interesse cuius sit, cùm ecclesiastici sit viri, & quotidie ecclesiarū lectione celebrētur. Quòd si eam Latinorum consuetudo non recepit inter scripturas Canonicas, nec Græcorum quidem ecclesiæ Apocalypsin Ioannis eadem libertate suscipiunt,& tamen nos vtraque suscipimus nequaquam huius temporis consuetudinem , sed veterū scriptorum autoritatem sequentes.

QVI FVERINT

Hebræi,

Iudæos Hebræos dici manifestius est, quām quod explicatione indigeat. Vnde autem dicti sint Hebræi, nō perinde cōstat inter omnes. Nam reperio triplices sententias. Primum quidam putarūt Hebræos dictos esse quasi Abrahæos, quam sentētiam aliquando secutus est Augustinus, ut est videre lib. i. quæstionū super Genesin, & lib. i. de consensu Euangeliistarum. Item in quæstionibus mixtis in vtrunque Testamentum, & fuit hæc sententia etiam Clementis lib. i. recognitionum ad fratrem Domini. Alij dictos putarunt quasi Heberæos ab Heber, quam sentētiam sequitur Hieronymus in quæstionibus in Genesin. Et Eusebius lib. 7. cap. 2. de præparatione Euangelica. Et Galatinus lib. 4. cap. 20. Hanc sentētiam e-

tiam postea est amplexus Augustinus, ut est videre lib. i. retractionū priorem scilicet corrigēs, ac remittit, nos ad librum 16. ciuitatis Dei, quem vide cap. 3. & ii. Tertij generis sunt Grammatici, qui Hebræos ab *Euer* propositione deriuant, quæ significat trans, seu vltra, cuius tamen radicale est *Auar* traiecit. Hinc *Iuri*, traiector. Porro illa compellatio primū tributa est Abrahamo, singulari quodā ornamēto, quod scilicet voci diuinæ obediens factus, ex Vr Chaldæorum profectus, in terram Canaan iter fatus Euphraten traiecerit. Vnde ab incolis dictus est *Iuri* quasi dicas, Ibræus, hoc est, traiector. Habes hoc cognominis epitheton primū in Genesios 14. Posteaquā enim Loth abductus esset ex Sodoma cum reliqua præda, illic scribitur: & venit qui euaserat & indicauit Abrahamo *Hauri* hoc

hoc est, Hebræo, &c. Hæc est vera sententia de origine huius nominis. Nam ut deducas ab Abrahamo repugnat Orthographia, cùm Abrahæ nomen per aleph scribatur, in *Haiuri*, autem per ain. Ut verò sumas ab Heber repugnat quod ante Abrahæ tempora hoc nomen non reperiatur in vñu. Itaque ab Abrahami facto, & ipse Abraham, & ipsius posteri dicti sunt Hebræi.

OCCASIO.

Occasio scribēdi hanc epistolam Apóstolo oblata est, partim ab industrata pertinacia Iudæorum, eorum nimirum qui Christum palam persequebantur, quemadmodum testatur Apóstolorum Acta. Hos igitur voluit reprimere metu iudiciorum diuinorum, ne pergerent in propriam perniciem sœuire: partim verò oblata est illi occasio, ex oscitātia eorum qui

M.J.

iam Christo nomé dederát. Ná hi ne
gligétiùs adhuc de Christo sentiebát,
quasi legis appendice opus esset Chri-
sti cultoribus, quemadmodum vide-
mus in superioribus epistolis passim
hoc studiosè ecclesiis conatos esse
obtrudere. Itaque hos ad perfectionē
hortatur, vtrisque autem ostendit
quáta sit Christi maiestas & dignitas.

ARGUMENTVM.

Hinc commodè sumi potest ar-
gumentum. Nam explicanda fuit di-
gnitas Christi, tam reprobis quām
credentibus, ideo ostendit illum esse
filium Dei, maiorem Angelis, Pro-
phetis, Mose, Aarone, Leui, & sacer-
dotium eius esse perfectissimum, vt
qui secundum ordinem Melchise-
dec constitutus sit summus Pontifex
sanctorum, hinc consequitur, quod
eius aduentu tota lex tanquam um-
bra sublata sit, & Christi meritum o-
mnium

mniū sit perfectissimum , vt qui v-
nica hostia semel oblata suis inuen-
rit æternam salutem . Ad harum re-
rum considerationem excitat , vt co-
gnoscāt iustitiam , quę ex Christi me-
rito fluit , hanc apud Deum solam va-
lere . Ideo capite ii . etiam ostendit ve-
teres omnes hac fide esse absolutos ,
& demum ad exercitia bonorum o-
perum , quæ ornent renati hominis
professionem , hortatur .

PROPOSITIO.

Propositio est generalis , quæ po-
nitur cap . 2 . scil . Iudæis sedulò curan-
dum est , ne deinceps ita cōtemptim
& neglectim vti hactenus doctrinā
de Christo audiant . Rationes sunt ,
partim ex i . partim ex cōsequentibus
capitibus , quia filius est Dei , quia An-
gelis maior , & reliquis quicunque in
veteri Testamento excelluerunt Pa-
triarchis & Prophetis , & quia perfe-

Etum & æternū est eius sacerdotium,
&c. cap. 6. ver. 20.

GENVS.

Genus principale didacticum est.
Nam respicit hunc scopum, ut Christi meritum agnoscāt esse perfectum
& absolutum, quo omnes corā Deo
à peccatis possint absolui. Sed acce-
dūt in tractatione varia, quæ hoc ex-
ornant & illustrant, imprimis συγκρι-
τικό, comparatiuum. Nam in princi-
pio statim Christū cōfert cum Pro-
phetis, deinde altius ascendens con-
fert eum cum Angelis, mox ad huma-
na reuersus cum Mose, Aarone, Leui,
& sacerdotium Christi cum sacerdo-
tio Leuitico, dignitatē Christi cum
Mosaica, omnibus hoc eripiēs quod
vni Christo confert, perfectionem
scil. intercessionis, vni Melchisedec
illum æquat tanquam verissimo ty-
po. Accedit etiā Protrepticum, quo
horta

hortatur vt Christi doctrinam submissè admittant, & in illa in dies crescent, vt cap. 3. facit, & 4. ver. ii. & 6. ver. ii. item 10. ver. 19. & consequentibus. Accedit etiam Ψευπρὸν, quo reprehendit in eis oscitantiam, vt cap. 5. ver. ii. & 6. ver. ii. vbi segnes appellat: tamen cōtra aliquoties laudat, quod est epæneticum, vt cap. 6. ver. 9. & 10. Item cap. 10. ver. 32. & 33. Sunt etiam quædam comminatoria, vt cap. 6. ver. 4. & 10. ver. 25. vbi agit cōtra impœnitentes, vt eos iræ diuinæ grauitate terneret. Accedunt etiam quædam historicæ, vt cap. 7. narrat historiam de Melchisedec, quādo vixerit, quid egerit, quanta fuerit eius dignitas apud Abrahamum, & similia. Item cap. 9. historicè narrat ornatum templi, & Leuitici sacerdotij, vt his omnibus Christi dignitatem possit præferre. quædam etiam ὀρεισμοῦ, vt cap. ii. de-

finit fidem, capite 6. iuramentum, &c.
Omnia istuc respiciūt, vt Christo se-
riō agnito, vni huic nitantur.

P A R T E S E P I- stolæ

Partes ferme perpetua disputatio-
ne cohærent. Nam exordium statim
ab ipsa re sumitur. Ostēdit enim do-
ctrinam Christi vnum esse ex modis
diuinæ reuelationis, eūmque pr̄stā-
tissimum, cum sit per filiū factus, re-
liqui solūm per Prophetas. Hinc sta-
tim ingreditur collationem Christi
& Angelorum usque ad caput 2.

2 Capite 2. statuatur secunda pars,
propositio, ad cuius confirmationem
pertinebat totum exordium, ideo ca-
pita connectuntur per illationem.

3 Tertia pars ibidem statuatur ver.
2. quæ continet pleniorem cōfirma-
tionem propositionis, quod scilicet
non minus contemni possit impūnc
hæc

hæc doctrina, quam legis doctrina, ac
in ox digreditur ver.6. vt ostédat cur
Christus debuerit assumere carnem.

Capite3. ingreditur nouum fun-
damentum de sacerdotio Christi , vt
superiora ad personā comodè pos-
sint referri, consequentia verò ad of-
ficiū Christi , pergit tamen in col-
lationis ordine , & cum Mose pri-
mùm cōfert, & eodem cap. digredi-
tur contra contemptores doctrinæ
Christi.

Cap.4. iterum concludit quod E-
uangelij doctrina non sit cōtemnen-
da, quod vocat oblatam occasionem
intrandi in requiem Domini negli-
gere.

Cap.5. Christi sacerdotium con-
fert cum Leuitico, & cum prætulisset
illum, inducit ordinem sacerdotij se-
cundum ordinem Melchisedec.

Cap.6. quasi iterum repetēs pro-
M.iiij.

propositionem ad perfectionem hortatur, & iterū agit contra cōtemptores.

Cap. 7. repetit collationem cum Melchisedec, & Leui, ac Aarone, ut omnibus perfectionis gloriā adimat.

Cap. 8. totam disputationem contrahit, & ostendit hoc sacerdotio exhibito tam perfecto vetera illa omnia esse abolita.

In hoc argumento pergit cap. 9. etiam. Nam perpetua est collatio sacerdotij, & Testamentorum quoque, & hīc Christo tribuit quod suis æternam acquisiuerit salutem, ver. 13. Atque haētenus doctrina dē persona & officio Christi. Reliqua deinceps habēt doctrinam bonorum operum, cap. 10.

Et cap. 11. fidei præstantiam nobis depingit, & ne conquereretur Iudæi ostendit Patriarchas omnes in veteri Testamento hac ipsa fide floruisse,

&

IN EPIST PAVLI. 185
& substitisse coram Deo, quam do-
cet Euangeliū.

Cap.12. & 13. expressius persequi-
tur fructus fidei secundum doctrinam
Christi, ac hortatur ad toleratiā sub
cruce, ad beneficentia, pacis studium,
vitæ innocentiam, dilectionem, hos-
pitalitatem, castitatem corporis, fru-
galitatem, gratitudinem erga docto-
res, & similes virtutes usque ad ver. 18
ubi statuatur Epilogus totius epistolæ,
in quo pro se orari petit, mox co-
precatur illis gratiam Dei. Tertiò, ut
boni consulant disputationem præ-
sentis epistolæ, quod magis disputan-
do, quam consolando cum illis ege-
rit: commendat etiam Timotheum,
& annexit cōsuetas salutationes.

Demum comprecatione
concluditur tota

epistola.

FINIS.



08.6.11. 3480

